



K40,000 Win Moni

wanwan long 4pla laki lain bai winim
K10,000
Sekim hau long joinim resis insait long ol stoa mipla makim



Pasim Manus ditensen senta... Suprim Kot tokim PNG na Australia

GAVMAN bilong Australia na PNG i no bihainim Mama Lo na arapela lo bilong PNG long kirapim ditensen na asailum prosesing senta long Manus Ailan, Suprim Kot disisen long PNG i tok.

Deputi Sif Jastis Sir Gibbs Salika na ol jas, Jastis Sir Bernard Sakora, Jastis Ambeng Kandakasi, Jastis Don Sawong na Jastis Terence Higgins, i painimaut olsem gavman bilong Australia na PNG i no bin bihainim stret ol lo bilong PNG long kamapim dispela rijonal prosesing senta long Manus Ailan.

Long dispela wik Tunde, dispela 5-pela jas bilong Suprim Kot i tok gavman bilong Australia na PNG i mas mekim olgeta samting long rausim dispela prosesing senta na salim ol asailum sika i go bek long Australia.

Suprim Kot i mekim dispela disisen bihain long pas-taim Oposisen Lida na Vanimo Green MP, Belden Namah, i bin askim kot long glasim na painimaut sapos tupela gavman i bihainim lo long kamapim dispela senta.

Moa stori long pes 2

PNG Air opim Buka na Aropa sevis pinis...

Poto i soim Minsta bilong Teknikel Sevis bilong Atonomas Gavman ov Bogenvil (ABG), Luke Karaston (werim grinpela kep), Sif Komesal Opisa bilong PNG Air, Paul Abbot, na arapela ol ABG gavman opisal na bikman bilong PNG Air i kam ausait long nupela ATR 72-600 balus bilong PNG Air long Aropa ples balus las wik Fonde. *Lukim moa stori long Pes 2, 3 na 21.*

Wantok Today
April 2016 isu i stap insait
Pes 9,10, 19,20

Everyone is a winner on the friendlier network

Buy and activate a new SIM and get a **FREE Day Pass**.

K5 tasol Dial 1250 to activate SIM

5 mins voice Any network in PNG

5 sms Any network in PNG

prepaid bmobile | vodafone

76003555 or 1555
connect@bmobile.com.pg
www.bmobile.com.pg

LIMITED PERIOD OFFER

Biknem man bilong PNG bai go pas long MRA – Kas tokaut

James G. Kila i raitim

MADANG Gavana i tokaut olsem wanpela biknem wantaim biknem long PNG husat i no pas wantaim intres long politiks bai go pas olsem siaman bilong nupela Manam Restoresen Atoriti (MRA).

Gavana Kas i tok klia long dispela, taim em i mekim toktok wantaim ol nius lain long Madang bihain long Palamen i givim tok-orait long Manam Restoresin Bill long Mas 3, 2016.

Em i tok Madang Provinsal Eksekutiv Kaunsil (PEC) bai kamapim wanpela nem bilong husat dispela biknem man bilong PNG na givim nem bilong em i go long Nesenel Eksekutiv Kaunsil (NEC) long



Madang Gavana Jim Kas long lephan wantaim wanpela investa long Madang.

givim las tok-orait long em.

Mista Kas i tok dispela biknem man husat bai stap olsem siaman bilong MRA i mas wanpela save-man husat i ken pulim mani na helpim i kam long ol dona ejensi long sapotim ron bilong MRA.

Em i laik lukim olsem ron bilong MRA

mas go wankain olsem Gazel Restoresin Atoriti long Is Nu Briten provins.

Gavana Kas i tokaut tu olsem kamap bilong MRA bai lukim planti milien Kina i kam insait long Madang provins long kirapim risetelmen bilong nupela taun bilong ol Manam ailan pipel long Andarum

long Midel Ramu eria.

Las wik Gavana Kas i bin flai long helikopta i go long Manam ailan we em i bin stop long Baliau viles long toktok wantaim ol sampela pipel husat i bin i go bek long ailan na i tok klia long Manam Restoresin Bil we Palamen i tok-orait long en long Mas 31.

Andarum risetelmen eria bai redi bihain long sampela yia – Kas

James G. Kila i raitim

PALAMEN i givim tok-orait pinis long Manam Restoresin Bil, tasol em bai kisim moa long tripela mun i go olsem 6-pela yia pastaim long ol pipel bilong Manam ailan i go sindaun gut long nupela Andarum risetelmen eria.

Madang Gavana, Jim Kas i tokaut long dispela las wik taim em i toktok wantaim ol nius lain long Madang long tok klia long Manam Restoresin Bil we Palamen i tok-orait long en long Mas 31, 2016.

Mista Kas i tokaut olsem gavman bai putim mani long wokim planti wok long sait long stretim ples na redim gut ol infrastraksa long Andarum long sait long edukesin, helt na ol arapela samting olsem ol haus na redim gut ples pastaim.

Dispela bai kisim samting olsem 3 igo 6-pela yia samting.

Gavana Kas i tok olsem bikpela tingting bilong em olsem wan, wan Manam ailan famili i mas kisim taitel bilong graun long go sindaun gut long Andarum na ol i mas gat ples long wokim gaden na tu stretim gut sindaun bilong ol.

Mista Kas i givim bikpela tok tenkyu bilong em i go long Praitim Minista Peter O’Neil, deputi bilong em Leo Dion, na pastaim Sif Seketeri Sir Manasupe Zurenuoc long gutpela stia bilong ol na luksave ol i givim long redim rot bilong MRA Bill long kisim tok-orait long palamen.

Mista Kas salim bikpela tok sori bilong em i go long ol pipel bilong Manam ailan, husat i stap wet longpela taim tru bihain long maunten paia long yia 2004 long painim gutpela ples long sindaun na kamapim gutpela laip bilong ol.

Em i tokaut tu olsem dispela Manam Restoresin Bil i bin kisim longpela taim long Nesenel Gavman i givim tok-orait long en bikos, i bin gat narapela bill tu em Memba bilong Bogia John Hickey i bin givim long Gavman.

Dispela narapela bil em we gavman i no laikim long en em Mista Hickey yet bai stap olsem siaman bilong MRA na ol arapela LLG presiden bai stap long bod bilong MRA.

Mista Kas i tok gavman i rausim dispela bill bilong Mista Hickey bikos em i no laikim politiks i go insait long ron bilong MRA.

Gavana Kas i tok em i luksave long hevi bilong ol Manam pipel na taim em i go insait olsem gavana bilong provins em i toktok strong olsem dispela MRA bill bilong em i mas kisim tok-orait bilong Palamen na helpim i mas go long ol Manam pipel.

I kam long pes 1...

Pasim Manus distensen senta

Taim Australia na PNG gavman i wok long sekim na glasim ol asailum sika long larim ol i kam ausait na statim nupela laip long PNG, Suprim Kot i mekim dispela disisen na i tokim tupela gavman long pasim dispela senta.

Long dispela disisen, Suprim Kot i tok ol dispela asailum sika manmeri, husat i kam long planti kain kain kantri, i laik go long Australia na laik stap long Australia.

Tasol gavman bilong Australia, i les long kisim ol dispela manmeri, husat i save yusim ol bot na abrusim birua long solwara, long go long Australia.

Australia i bin sainim wanpela agrimen long yia 2012 na 2013 wantaim PNG long salim ol dispela asailum sika manmeri i kam long Manus na bihain long wok painimaut i sekim olsem ol i refiuji tru, ol i ken kam aut long ditensen senta na statim nupela

laip long PNG.

Tasol kot i tok Asutralia na PNG gavman i fosim ol dispela manmeri long kam long PNG taim ol asailum sika yet i les long kam stap long PNG.

Kot i luksave olsem tupela gavman i no rispektim ol raits bilong ol dispela asailum sika manmeri na dispela em i brukim Mama Lo na arapela ol lo bilong PNG.

Long dispela as, Suprim Kot i tokim PNG

na Australia long pasim dispela senta. Long wankain taim, Memba bilong Manus Ronnie Knight, i amamas long dispela disisen long pasim Manus ditensen senta.

“Planti taim mi bin askim gavman long pasim dispela ditensen senta. Australia i laik sevim intres bilong em yet.

“Ol asples Manus i no kisim wanpela gutpela benefit. Australia yet i kisim benefit na mi bin singautim gavman long pasim.

PUBLIC NOTICE



This is to let business houses and clients of Word Publishing Company, publisher of *Wantok Niuspepa* know that Augustine Unido no longer works for Word Publishing Company as of 25th of April 2016.

Any correspondence or business conducted after this date, Word Publishing Company won't be responsible.

Bogenvil pipel wanbel long PNG Air

OL lida na manmeri bilong Atonomas Rijon bilong Bogenvil (AROB) i wanbel tru long PNG Air i statim gen komesal flait sevis i go long Buka na Aropa ples balus.

Minista bilong Teknikel Sevises bilong Atonomas Gavman bilong Bogenvil (ABG), Luke Karaston, i tok ol pipel na gavman bilong Bogenvil i wanbel tru na amamas long lukim PNG Air i laik statim ol komesal flait long Buka na Aropa ples balus.

Mista Karaston wantaim ABG Memba bilong Saut Nasioi Konstituensi, Simon Dasiona, ol papagraun na memba bilong kaunsil ov eldas, i bin welkamim nupela ATR 72-600 balus bilong PNG Air long las wik Fonde long Aropa ples balus.

Sif Komesal Opisa bilong PNG Air Paul Abbot wantaim ol senia menesmen lain bilong PNG Air wantaim ol nius manmeri i bin kisim dispela

balus i go long Bogenvil.

Mista Karaston i tok ol pipel gavman na pipel i amamas long lukim dispela nupela balus i kam long Buka na Aropa.

“Ol pipel bai yusim dispela balus long raun i go long arapela ples na kambek gen long Bogenvil. Mi amamas tru long PNG Air i opim sevis long Bogenvil.

“Mi laik tokim menesmen bilong kampani olsem mipela bai lukautim balus na ol wok manmeri bilong PNG Air,” Mista Karaston i tok.

Em i tok tenkyu long PNG Air i bilip long Bogenvil na opim dispela nupela sevis.

Mista Dasiona i tok em i amamas tru long PNG Air bikos dispela nupela sevis bai helpim ol pipel bilong em long Saut Nasioi Konstituensi.

“Tenkyu PNG Air long kam long Aropa. Ol pipel bilong mi bai lukau-

tim balus bilong yu. No ken wari long sekyuriti. Mipela bai lukautim balus na ol wok manmeri,” Mista Dasiona i tok.

Mista Abbot i tok PNG Air i kisim dispela nupela balus kam long Buka na Aropa long soim olsem kampani i laik sevim ol anmeri long Bogenvil.

“Dispela balus ya em i nupela balus kamaut long faktori long Frans. Em i no go pundaun long arapela ples balus.

“Bihain long em lusim Frans na i kam pundaun long Pot Mosbi long Sande (long bipo las wik), mipela i kisim i kam long Buka na Arop ples balus,” Mista Abbot i tok.

Em i tok dispela i soim olsem dispela nupela balus bai sevim gut ol pipel bilong Bogenvil. Namba wan komesal flait i go long Buka na Aropa i stat pinis long dispela wik Mande (25 April 2016).

India bai kirapim bikpela marasin fektori

INDIA bai kirapim wanpela bikpela faktori bilong mekim marasin long PNG. Dispela faktori bai mekim ol kain kain marasin long yusim long PNG na long salim i go aut tu long Australia, Nu Silan na arapela ol kantri insait long Esia-Pasifik rijn.

Praim Minista Peter O'Neill i tok dispela plen long kirapim marasin fektori bai lukim gavman bilong India i investim K7.2

milien long mekim ol marasin bilong sik AIDS na sampela ol marasin we dispela fektori bai mekim.

Mista O'Neill i tok Presiden bilong India, Pranab Mukherjee, bai kam long dispela wik Fonde long lukluk raun long PNG, na moa toktok long dispela marasin fektori bai kamap taim gavman bilong PNG na India i sainim sampela agrimen long dispela wik.

Mista O'Neill i tok poroman na invesmen namel long India na PNG i wok long gro na dispela visit bilong presiden bai apim level bilong pasin poroman namel long tupela kantri.

Sampela ol bisnis manmeri bilong India bai bihainim Presiden Mukherjee i kam long PNG long painim ol sampela sans long mekim bisnis.

Presiden Mukherjee bai kam long kantri tumaro na bai go bek long India long Fraide nait.



Praim Minista Peter O'Neill

Nupela balus long sevim Bogenvil

NUPELA ATR 72-600 balus bilong PNG Air we ol bik man bilong kampani wantaim ol arapela manmeri i bin kisim i go long Buka na Aropa ples balus long las wik Fonde bai sevim ol manmeri bilong Bogenvil.

Taim Bogenvi i wok long kirap bihain long bikpela pait na kraises i pinis, planti ol bisnis haus na kampani i bin les long go bek bikos ol i no gat bilip long sefti bilong invesmen bilong ol.

Tasol balus kampani bilong PNG yet, PNG Air, i bilip strong olsem ol pipel bilong Bogenvil i mas kisim gutpela sevis na Bogenvil bai senis na i kamap gutpela ples long mekim bisnis gen.

Taim namba tri nupela ATR 72-600 balus bilong PNG Air, P2-ATB, i bin pundaun long Buka na Aropa ples balus las wik, planti ol lida man bilong Atonomas Gavman bilong Bogenvil (ABG), ol papagraun, ol manmeri na pikinini i bin amamas long lukim na tok welkam long dispela nupela balus.



Ol skul sumatin bilong Kamarau Intenesenel Skul i go lukluk raun long insait bilong nupela ATR balus bilong PNG Air long Buka ples balus.

Sif Komesal Opisa bilong PNG Air, Paul Abbot, i bin amamas wantaim na larim ol manmeri na liklik skul pikinini bilong Kamarau Intenesenel Skul i go lukluk raun insait long balus.

Stat long April 25, Mista Abbot i tok PNG Air bai statim ol komesal flait long sevim manmeri bilong Bogenvil.

"Mipela i amamas stret long bikpela sapot bilong ol manmeri PNG na dispela bai lukim mipela i apim

namba bilong ol komesal flait bilong PNG Air i go long ol arapela ples balus insait long kantri.

"Long mun Desemba las yia, mipela i statim nupela flait i go long Vanimo na long (dispela wik) Mande bai mipela i statim nupela flait or ran bilong balus i go long Buka na Aropa ples balus.

"Prais bilong baim balus tiket long go kam long Buka na Aropa em i K279 tasol na mipela bai stretim ol nara-

pela koneksen flait i go long arapela ples balus long PNG.

"Mipela i amamas long daunim prais bilong baim balus bikos dispela bai helpim developmen bilong dispela kantri na helpim moa manmeri long mekim bisnis," Mista Abbot i tok.

Prais bilong baim balus long Aropa na go long arapela ples balus i stat long K436 long go long Kokopo, na K634 long go long Lae," Mr Abbot said.

NEFC Nupela Komisina i wokim tok promis



Ol nupela komisina bilong Nesenel Ikonmik na Fiskal Komisen i sindaun wantaim CEO Hohora Suve bihain long ol i sainim tok promis bilong ol. L-R Dokta Alphonse Gelu, CEO Hohora Suve na Uvenama Rova.

Long Fond 21 Epril, 2016 nupela komisina i bin wokim tok promis long opis bilong Gavman haus. Gavana Jeneral, Gren Sif Sir Michael Ogio i bin stap long lukim na sainim dispela tok promis wantiam wanpela liklik kaikai tu wantaim ol famili bilong ol komisina na ol NEFC opisa.

Tupela nupela

komisina em; Dokta Alphonse Gelu, Rejistra bilong Opis bilong Rejistra bilong Politikai Pati na Kendidet Komisen na Uvenama Rove, Asembli Seketeri bilong Yunaitet Sios bilong Papua Niugini na Solomon Ailan. Hohora Suve (NEFC CEO)em i Siaman.

Wok bilong makim ol komisina i stap aninit long NEFC Ekt 1995 tasol

ol i no bin makim ol komisina i kami nap nau. Olsem na dispela em i namba wan taim ol i makim ol komisina. Nesenel Ikonmik na Fiskal Komisen (NEFC) i amamas na tok welkam long tupela nupela komisina ol i bin makim.

Tupela komisina i gat bikpela ekspiriens na save long wok bilong disentralaisesen na provin-

sal afes. NEFC i gat bilip olsem dispela bikpela ekspiriens na save bilong tupela bai inap long sapotim komisen long wok bilong em.

Wok bilong NEFC em long givim tok stia long ol provins na lokal level gavman long wei bilong yusim mani gut long bringim ol sevis i go long ol rurel pipel bilong PNG.

SAVING FOR A REASON?

BEFORE

SAVINGS IN A JAR

- ✓ Easy access to spend.
- ✓ No interest earned.
- ✓ Funds are not secure.

NOW

SAVINGS BSP PLUS SAVER

- ✓ No Card Access.
- ✓ Tiered credit interest.
- ✓ Linked to Mobile & Internet Banking.

A BSP Plus Saver Account for every savings goal

- Home Equity
- Dream Wedding
- Medical Bills & Emergencies
- Birthday Party
- New Gadgets & Phone
- Overseas Holiday

www.bsp.com.pg [f](#) [t](#) [in](#)

Ol wok redi long Bogenvil referendam i stat ... 2019 em yia bilong holim vot

OL i makim yia 2019 olsem det we ol pipel bilong Bogenvil bai holim referendam vot.

Ol wok redi long Bogenvil referendam i go het nau wantaim Join Supavaiseri Komiti (JSC) bai bung long Me 6 long skruim ol toktok na plen long dispela samting.

Opis bilong Nesanel Kodinesen Opis bilong Bogenvil Afeas (NCOBA) i tok sans i op nau long Nesanel na Bogenvil gavman long toktok na makim det long holim Bogenvil referendam.

Mekim klia referendudum, dispela i min olsem ol pipel bilong Bogenvil bai holim vot long bruk lusim PNG, o stap wantaim PNG.

Long las wik, ol bikman bilong Nesanel

Gavman, Atonomas Bogenvil Gavman (ABG) na ol dona patna i bin bung long Mosbi long toktok na makim 2019 olsem yia long holim referendam vot. Na olgeta wok redi bai fokus long dispela yia.

Ekting Dairekta bilong NCOBA, John Avira, i tok Nesanel na Bogenvil gavman i save olsem sampela samting i stap we ol i mas edresim gut na tu, i mas gat join wokim grup long edvaisim Join Bogenvil Referendam Komiti J(BRC) long wok bilong makim det long holim referendam.

Em i tok ol bung wokim grup bai kam long ol nesanel gavman dipatmen na ABG we NCOBA i wanpela long ol tu.

Mista Avira i tok long bung bilong las wik, Vais Presiden bilong ABG, Patrick Nisira, na Bogenvil Afeas Minista, Joe Lera, i bin tok bikpela samting em i mas gat ol bung long toktok long politik bilong Bogenvil na ol samting olsem lusim ol masket o gan, gutpela gavanens, mak long krismas long ol man i vot na i mas gat wanpela indipenden ejensi long ranim referendam.

Ol lain long bung i bin wanbel long holim bung toktok bihain long olgeta tupela mun na dispela i stap aninit long Referendam wok plen.

Namba wan bung bilong JBRC bai kamap long Me 4, 2016 na dispela em long redi long

JSB bai kamap long Me 6, 2016.

Mista Avira i tok bung bilong JSB i lok long Me 6 na em i tok tu olsem Nesanel Gavman na ABG i redi long go insait long ol bikpela program long dispela yia bihain long Desemba 8, 2015 taim ol i no bin wokim wanpela bung.

Ol bai tebolim ol samting we ol i bin toktok long ol long 2015 Kokopo JSB lo ng tok oraitim na go hetim.

Minista Lera i bin tokim ABG olsem em i wok bilong em nau long lukim olsem ol ki stekholda i wok bung wantaim long ol wok redi bilong referendam, na olgeta lida, ol opisel na pablik i mas stap insait long ol toktok.

Level bilong stil pasin go daun long NSL



Sif Menesa Memba Sevis, Charlie Gilichibi (rait han) na Menesa Memba Sevis Chris Mota.

NAMBA bilong frot o paul pasin long stilim mani long Nambawan Super Limited (NSL) i go daun, Sif Menesa Memba Sevis, Charlie Gilichibi, i tok.

Mista Gilichibi i tok NSL nau i kamap wanpela gutpela fainensal institusen long kantri bikos long las yia em i no lukim wanpela frot pasin i kamap.

“Long yia 2015, mipela i no lukim wanpela frot o paul pasin i kamap. No gat wan-

pela i kamap,” Mista Gilichibi i tok.

Em i tok long ol arapela yia, sampela frot pasin i bin kamap tasol las yia ol nupela kompiuta sistem bilong NSL i abrusim dispela kain pasin long kamap.

“Long 2014, 5-pela frot i bin kamap na mipela i bin lukim na stopim. Long yia 2013, 4-pela i bin kamap, na long arapela yia 10-pela i bin kamap,” em i tok.

Mista Gilichibi i tok nupela sistem bilong

NSL long stopim ol hat kopi bilong anual stetem i go aut long ol memba em i wanpela wei we i stopim pasin frot long kamap.

“Mi laik tokim olgeta memba bilong NSL. Olgeta mani bilong yupela i stap gut. Mi pela i mekim planti gutpela samting na senisim ol sistem long larim ol mani bilong yupela i stap gut, na no gat wanpela man bai mekim paul pasin long stilim,” em i tok.



Wanpela grup bilong Buka I pilai mambu ben long Buka ples balus long tok welkam long nupela ATR 72-600 balus bilong PNG Air long Buka.

Aihi LLG meri amamas long saining MOU

Paulus Tali i raitim

OL meri insait long Wod i inap long Wod 17 long Aihi LLG nau bai amamas long wanem, sainim bilong Memorandum ov Andastending bin kamap pinis.

Dispela MOA saining i bin kamap long Malahang we lukim ol bikman bilong Aihi asples na ol meri long Wod 1 i go long 17, olgeta i bin kamap long witnesim dispela program.

Tu MOA bai helpim ol long kain kain wok bi-

long ol meri insait long LLG na komyuniti.

Aihi LLG presiden na siaman bilong Human Risos insait long Morobe Provinsal Gavman, Sam Agi David, i bin sainim Mou namel long Aihi LLG, na ol mama graun.

Misis Mugim Poam i bin givim graun i go long Aihi long ol meri long Wod 1 inap long 17 i ken go het long mekim wok projek long gaden kaikai olsem taro na tapiok long planim na kamapim mani bilong ol meri long sapatim wok program bilong ol.

Presiden Agi David i tok wok bai kamap namel long ol meri long wod insait long Aihi i noken slip bikos nau em i taim bilong mekim wok na sanap long strong bilong ol yet.

Em i bin tokim ol meri olsem bai ol i gat mani bilong ol yet long strongim laip bilong ol.

Long wainkain taim tu, mamagraun, Misis Poam i tok as tingting em i bin givim graun bikos em i laik lukim sevis i mas kamap na ol inap lukim ol blesing bilong em.

TOKSAVE!

Long nambawan de bilong Mun Me (1) 2016, olgeta email etres bilong Word Publishing Company, pablisa bilong **Wantok Niuspepa** bai senis.

Pastaim email etres em: @wantok.com.pg

Nau email etres em stap olsem: @wantokniuspepa.com

Toksave, plis salim ol samting i kam long nupela atres olsem editorial@wantokniuspepa.com o jwilson@wantokniuspepa.com

Dispela toksave i kam long Jenerel Menesa bilong Word Publing Company



Putim ai long iMarket



WANPELA bikpela bung bilong ol liklik bisnis manmeri long Pot Mosbi i lukim planti manmeri PNG i kisim salens long yusim mobail pon na mekim bisnis.

e-Komes long SME samit long Pot Mosbi we Invesmen Promosen Atoriti (IPA) na APEC Bisnis Edvaisori Kaunsil (ABAC) i holim i lukim ai bilong planti manmeri i kirap bikos ol i no bin save long yusim mobail pon long mekim bisnis.

Wanpela bikmeri long Saina, nem bilong em i Dianne Wang, i autim ol gutpela toktok long kirapim e-bisnis wantaim ol kompyuta na mobail pon.

Mis Wang i soim sampela nupela rot long helpim ol SME ona long kisim ol samting long faktori stret na salim long PNG.

Dispela i ken daunim mani mak bilong kisim ol samting na helpim ol liklik bisnis long gro. PNG i no gat wanpela e-Komes trading platform.

Tasol wanpela nupela kampani bilong Israel i kam insait pinis long helpim ol SME na bisnis manmeri long PNG i yusim mobail pon long mekim bisnis.

Nem bilong dispela nupela kampani em i iMarket na em i kam insait pinis long PNG.

Menesing Dairekta bilong iMarket, Gilad Lev, i tok klostu taim tasol ol bai

Hagen.

“iMarket i kam insait pinis long pinis. Mipela bai opim nupela opis long Pot Mosbi klostu taim, na bihain go aut long arapela ol senta.

“Mipela bai kamapim wanpela e-Komes sistem long PNG. Bai mipela i yusim ol teknoloji bilong Israel i kirapim dispela kampani.


“Mipela i gat ol patna bilong mipela long PNG na ol bisnis patna bilong mipela i sapatim mipela long helpim arapela ol kastoma long PNG,” em i tok.

opim nupela opis bilong ol long Pot Mosbi na opim arapela ol rijonal opis long Lae, Kokopo na Mt

Let's stop Malaria from damaging our lives and nation

PNG is one of only three malaria-endemic countries within the Pacific Region and bears about 98% of the malaria burden in the Pacific Region (MMV, 2015). Malaria incidence is 151 cases per 1,000 people in PNG in 2013 (2014 PNG Health Sector Performance Annual Review), 38.5 deaths due to malaria per 100,000 people (2012 WHO PNG Statistical Profile).

An average of 1.5-1.8 million suspected cases of malaria are seen at healthcare facilities annually (Country Health Information Profiles- WHO). This high incidence of malaria is not only affecting quality of people's life but also adversely affecting the revenue generation in the country because of huge man-hours lost due to Malaria.



The Challenges

According to a Fides news service report, approximately 90% of the population of Papua New Guinea is at risk of deadly malaria. Mosquitoes, which are the vectors of the disease, are prolific in the rain soaked, hot and humid climate of the country. Poor regulatory power, ineffective delivery structure, drug resistant parasites, the lack of an effective health system, the diverse spread of PNG's population are all challenges to malaria control in PNG. The PNG National Department of Health (NDoH) National Malaria Control Strategic Plan 2014-2018 is determined on achieving and sustaining universal coverage and access to malaria control interventions. The goal is to achieve a reduction in the malaria burden in PNG (MMV, 2015).

The funding to enable the implementation of this Plan has been under significant review for some months between the PNG Government, NDoH Malaria National Technical Working Group and the Global Fund.

The financial algorithms to wipe away the scare of Malaria

With 98% of funding from Global Fund, a sum of 26 million USD was spent to control Malaria in the year 2013.

The financial resources provided through the Global Fund come from many donors, from Australia, the United States and the European Union. The grant agreements embody a partnership with Papua New Guinea and Rotarians against Malaria, Population Services International and World Vision, who will implement the programmes. The two grants, for a combined total of USD32 million, will be used to fund distribution of 2.8 million mosquito nets and training of community health workers.

Programmes to eradicate the spread of Malaria in PNG

Papua New Guinea introduced a new national malaria treatment protocol (NMT) with the recommendations of the World Health Organization. NMT introduced artemether-lumefantrine (AL) as the new first-line treatment for uncomplicated Plasmodium falciparum malaria. Dihydroartemisinin-piperaquine was also introduced as the new second-line treatment for uncomplicated P. falciparum and P. vivax malaria.

The Papua New Guinea Institute of Medical Research (PNGIMR), as a sub-recipient in the Global Fund (GF) Round 8 Malaria Grant to Papua New Guinea (PNG), was contracted to provide a range of monitoring and evaluation (M&E) activities in support of the PNG National Malaria Control Programme, 2009-2014.

Know more about Malaria

What is Malaria?

Malaria is a mosquito-borne disease caused by the parasite Plasmodium with symptoms of high fever along with shaking chills and anaemia. When an infected mosquito bites you, you can be infected with malaria.

There are 5 species of Plasmodium that infect people with malaria.

- P. Falciparum
- P. Vivax,
- P. Malariae
- P. Ovale
- P. Knowlesi

Of these P. Falciparum and P. Vivax cause life-threatening malarial complications.

How is malaria transmitted?

When a mosquito bites an infected person, it carries malarial parasites and then spreads the disease to healthy people through its bite. The malaria parasite lives in the bodies of people and mosquitoes. The malaria parasite is generally transmitted to people by mosquitoes. In some cases, a person may contract malaria through contaminated blood during blood transfusion, or infected needles. In preg-

nant women, malaria may be transmitted from a mother to her fetus.

What are the symptoms of Malaria?

Common symptoms of malaria include:

- Shaking chills
- High fever
- Profuse sweating
- Headache
- Nausea
- Vomiting
- Diarrhea
- Anaemia
- Muscle pain
- Convulsions
- Coma
- Bloody stools

Life-Threatening Complications of Malaria

Cerebral malaria: The complicated malarial symptom includes seizures with fever caused by swelling of blood vessels in the brain or cerebral malaria.

Pulmonary edema: Malaria can cause accumulation of fluid inside lungs causing breathing problems or pulmonary edema.

Organ failure: Malaria can lead to organ failures of kidney, liver and spleen.

Severe anaemia: The destruction of red blood cells results in anaemia and low blood sugar.

Measures to prevent malaria

Use mosquito repellents: Use insect sprays containing pyrethroids in all your living and sleeping areas, especially during evening and night hours.

Avoid travelling to mosquito-infested regions: Talk to your doctor about anti-malarial drugs in case of travelling to these regions. Stay safe at nights – Use nets and repellents. Try to avoid sleeping outside where mosquitoes are more like standing water (tyres, lakes, waste dumps). Use bed-net impregnated with insecticides.

Check the net is not damaged and ensure it is properly tucked underneath your mattress. Keep the windows and doors with additional nets attached to it. Keep the air-conditioning on, as mosquitoes tend to stay away from cool, air-conditioned rooms.

Go for long sleeves and light colours: Wear long sleeve shirts and trousers in evening and at night. Lesser the skin exposed, the better. Wear light coloured clothes in order to increase the protection.

Eradicate mosquito-breeding areas like stagnant water in your surroundings.

SHARING A PROUD MOMENT OF PIH WITH YOU!

We are very pleased to announce that 4 of our Doctors are now officially authorized by the UN Medical Services Division as **UN Examining Physicians in PNG**, and are authorized to process Medical Evacuations for UN Staff.

CONGRATULATIONS TO

Dr. Jannatul Ferdous | Dr. Mathias Sapuri | Dr. Paul Alexander | Dr. Ronald Galicio



Trupela Enga mangi



Anton wantaim kauboi hat i sanap wantaim Polis Komanda bilong Enga George Kakas na Tribal Fundation Dairekta Operesen Michelle Hau'ofa, pikinini meri bilong em na CEO bilong Enga provinsal haus sik Aaron Luai long ples balus bilong Wapenamenda long Enga provins.

Nicky Bernard i raitim

YUMI Olgeta save bihain kastom bilong yumi taim yumi liklik na kam bikpela taim yumi stap long ples bilong yumi.

Dispela kastom pasin bai pas long tingting na het bilong yumi inap yumi kam aut na skul na kisim stail bilong ol narapela provins na kantri.

Wanpela yangpela Amerika mangi we mama i karim na kamap bikpela long Wapenamenda long Enga provins taim papa na mama bilong em kam mekim wok misinari long hap.

Anton Lutz, em trupela mangi Enga, em bon long hap na mekim skul bilong em tu long Enga provins na em save gut tru long pasin kastom bilong Enga provins na Wapenamenda.

Papa na mama bilong em i raun long olgeta hap long Enga long

autim tok bilong lotu na tu helpim long wok bilong helt insait long Enga provins.

Anton, i bon wantaim kalsa na kastom bilong Enga inap em kam bikpela na go skul long ples bilong ol long Amereka.

Anton i gat planti stori bilong em wantaim kalsa na kastom pasin bilong Enga. Taim em go bek na skul long Amerika, em bihainim pasin kastom na kalsa bilong Enga inap em stap longpela taim liklik.

Sampela stori bilong em, em yet save stori na sampela ol wan skul na wan klen em bikpela wantaim bai stori long pasin bilong dispela Amerika mangi tasol em save tok Enga, ples bilong em.

Wanpela stori bilong Anton em, taim em liklik mangi yet, sampela Amerika lain i kam long Enga taim papa bilong em salim tok long ol long kam raun.

Ol bin mekim wanpela bung na Anton wantaim ol mangi bin raun long bus na kam bek na kisim win stap long wanpela longpela haus.

Anton wantaim ol mangi stap long fran bilong dispela long pela haus, na taim Amerika lain pinis long bung ol wokabout kam long fran bilong haus we Anton na ol mangi stap. Wanpela meri Amerika kam na kalapim lek bilong Anton.

Dispela i mekim Anton i kra i nogut tru long wanem dispela wait meri i kalapim lek bilong em. Anton i no stop kra i na mekim dispela wait meri tu i paul olgeta long wanem samting em mekim long Anton.

Papa bilong Anton i kam na askim Anton long wai em kra i na Anton tokim papa bilong em olsem dispela wait meri kalapim lek bilong em na em mas kilim pik long tok sori long em na ol poro-

man bilong em.

Papa bilong Anton i save pinis olsem Anton em mangi Enga na em save bihain kastom bilong ol Enga stret.

Papa bilong Anton kisim sampela mani na givim long wait meri ya na tokim em long go givim Anton na tok sori long em. Papa bilong Anton tu i tok klia long wait meri ya olsem em bihainim kastom bilong ol Enga long wanem em bon long hia na i tambu tru long ol meri kalapim lek bilong ol man.

Wait meri go givim mani long Anton na tok sori long em long ai bilong ol poroman bilong em. Anton kisim dispela mani na givim gen long ol poroman bilong em long kilim sem bilong em.

Dispela pasin kastom i stap long Anton taim em liklik i kam inap nau em bikman na sampela bilong ol kastom tu i lus liklik long

Anton.

Anton Lutz i kisim ples bilong papa bilong em olsem misinari na stap yet long Wapenamenda long Enga, dispela taim em save raun long ol liklik ples long givim skul long ol ples lain long noken save long Sanguma na helpim ol lain husat ol save kisim hevi taim ol ples lain save rausim ol o traim long kilim olsem ol mekim Sanguma.

Anton tu save wok olsem enjinia long mekim ol liklik ples balus long hap ol kar i hat long go long en. Na stretim tu haus sik we papa bilong em bin kirapim long Wapenamenda.

Anton em trupela mangi Enga. Olgeta lain long Enga bai save long em na taim em Tok Pisin long yu, bai yu i no inap paul, Tok Pisin bilong Enga i stap stret long maus bilong em



Ol lain husat save helpim Anton long wok bilong em antap long Enga. Long lep han Mama bilong Anton Julie Lutz, Anton Lutz, Michelle Hau'ofa, Nes Mark, Ruth Kissam na Pastor Peter Pyandea.

Ol Madang tisa bel-hevi long nupela SBE kurikulum

James G. Kila i raitim

OL TISA long Madang provins i soim bel-hevi bilong ol long las wik taim ol i lukim wanpela buk stua long taun i salim ol teks buk na tisa gaid bilong nupela Standet Bes Edukesen kurikulum.

Ol i no wanbel bikos skul bilong ol i no kisim ol risos bilong SBE yet long Nesenel Edukesen Dipatmen na ol tisa tu i no kisim in-sevis o trening long tisim dispela nupela SBE kurikulum yet.

Ol tisa i tokaut olsem skul bilong ol i no kisim ol risos bilong dispela nupela SBE kurikulum yet na ol i guria tru olsem ol buk stua i stat pinis long salim na tisa gaid buk, taim ol i lukim wanpela bikipela sain ausait long Kristen Buk Melanesia (CBM) stua long Madang na ol i go insait long lukim ol buk ol lain i salim.

Dispela buk i kam aninit long 'Bilum Buk' bren na ol i kamapim na prinim dispela buk long Australia.

Dispela ol buk aninit long Bilum Buk pablikesen i no gat nem na sig-nesa bilong Nesenel Seketeri bilong PNG Edukesen Dipatmen long en.

Ol dispela tisa i tokaut olsem dis-



Tupela tisa long Madang i skelim ol sumatin teks buk na tisa gaid em Bilum Buk i printim long Australia na nau i salim long PNG.

pela nupela SBE kurikulum em Nesenel Edukesen Dipatmen i kamapim long las yia.

Em bai senisim Autkam Bes Edukesen (OBE), we planti lain i no amamas tumas long en bikos ol sumatin i wok long lainim Tok-ples long skul na save bilong ol long Inglis i no gutpela tumas.

Ol tisa i tokaut tu olsem olgeta ol provins insait long PNG i no kisim yet ol risos i kam long Nesenel Edukesen Dipatmen long skulim ol pikinini long dispela nupela SBE.

Wanpela senia tisa long Sen Michael Praimeri Skul long Alexishafen, I tok olsem em i skelim olsem ol dispela nupela buk bilong Bilum Buk em gutpela long ol sumatin i lainim foeniks o wei bilong kolim ol wod bihainim saun long Tok Inglis.

PNG Nesenel Dipatmen ov Edukesen i bin strongim disisen long kamap wantaim SBE kurikulum. Ekting Seketeri bilong Edukesen, Uke Kombra i tokaut olsem dispela nupela SBE bai bringim



Sain i soim 'Bilum Books' we wanpela buk stua i salim long Madang.

Ol poto: James G. Kila

Standet long lainim samting insait long skul kurikulum go antap na helpim ol tisa long redim lesen na profesenol divelopmen, redim ol tes, sekim gut ol skul, gutpela ron bilong ol skul na stretim straksa bilong ol skul sistem.

Ol tisa i tokim dispela niusman olsem ol i no amamas long Nesenel Edukesen Dipatmen I wok isi, isi tumas long redim SBE risos na tu isi, isi tru long givim insevis o trening long ol tisa long tisim dispela nupela SBE kurikulum.

Ol tisa i tok strong olsem Nesenel Edukesen Dipatmen i mas givim olgeta risos long go wantaim dispela nupela SBE long helpim ol tisa long tisim ol sumatin.

Ol tisa i tok ol wokman tasol bilong gavman na bai bihainim tasol wanem disisen bilong Nesenel Gavman aninit long Nesenel Edukesen Dipatmen, tasol bikipela samting em Gavman bai givim ol tisa olgeta risos long ol skul long kantri na ol tisa na ol bai wokim gut wok bilong ol long tisim ol sumatin aninit long SBE.

Fiji Polis Komisina i kam long PNG



Polis Komisina Gari Baki i givim wanpela presen i go long Polis Komisina bilong Fiji, Sitiveni Qiliho, long haus kaikai bilong ol opisa long Bomana Polis Kolis.

POLIS Komisina bilong Fiji, Brigadier Jenerel Sitiveni T Qiliho i kam long Pot Mosbi long las wik long toktok long eria bilong wok bung wantaim Royal Papua Niugini Konstabuleri.

Eria bilong toktok em long wok aninit long ol wok bilong Fiji olsem Melenesien Spiahet Grup (MSG) Polis aidia we Ailan Stet i lukluk long go pas long namba wan Pis Kiping Polis Fos bilong MSG we bipo i bilong UN Pis Kiping wok.

Komisina Qiliho na 8-pela memba bilong em i bin kam long kantri Tunde, Epril 21. Ol i bin hostim opisal kaikai bilong Komisina Qiliho na tim bilong em long Tunde nait long kaikai haus bilong ol

opisa long Bomana Polis Kolis. Bihain, Fiji polis tim i go lukim polis hetkwata long Konedobu we ol i bin bung na toktok.

Komisina Qiliho i bung wantaim Polis Komisina Gari Baki long toktok long Polis Koporesen program we ol bikipela kraim i kam insait long bagarapim Pasifik Rijen.

Long bung bilong MAG Polis Komisina i bin kamap long Solomon Ailan long las yia, ol i bin makim Fiji long go pas long MSG Pis Kiping Polis wantaim ol polis long Fiji, Solomon Ailan, Vanuatu na PNG bilong Yunaitet Nesen Pis Kiping Operesen long olgeta hap long wol.

MSG Sekreteriet i bin kamapim Dipatmen bilong Pis Kiping Operesen

(DPKO) long Pot Vila, Vanuatu long lukluk long dispela aidia, tasol ol i no kamapim bikos strongpela kraitaria bilong UN i kam insait.

Wanpela rikwaimen em bilong kisim ol kwalifai UN trena long yusim ol trening fesiliti.

Ol i makim Fiji long go pas long dispela wok bikos militeri bilong kantri na sampela ol wok bilong Polis Fos em ol i bin strongim pinis wantaim UN Pis Kiping long olgeta hap bilong wol.

Komisina Baki i tok, "RPNGC i stap pinis na i redi long wok bung wantaim MSG Polis Yunit we Fiji bai go pas long UN misin long ol narapela kantri.



Komisina Gari Baki i sanap long namba 5 ples long lep han, Misin Komanda Bruce Giles i sanap long namba 4 ples long lep han na ol Senia Opisa i bin sanap wantaim long taim bilong lonsim nupela polis rikrut trening manuel.

Baki i tokaut long nupela polis rikrut kos

POLIS Komisina Gari Baki i tokaut long nupela polis rikrut kos bilong Bomana Polis Kolis wantaim Australia Federal Polis Misin Komanda, Bruce Giles, na ol narapela opisa long Pot Mosbi.

Komisina Baki i tok, "Lonsing bilong nupela polis rikrut kos em i wanpela mak we Bomana Polis Kolis na Royel Papua Niugini Konstabuleri i winim.

"Ol i save kisim skul toktok long Bomana long disiplin em i narapela kain olgeta long kisim ol man na meri i go long fil bilong wok, na taim ol i save gol long wok ples em komand na kontrol i save lukautim ol. "Mi tok tenkyu na



AFP Misin Komanda Asisten Komisina, Bruce Giles, na Polis Komisina, Gari Baki, i tokaut long manuel bilong nupela polis rikrut trening kos.

amamas long Komandan na tim bilong em long kolis long putim ol dispela skul toktok long wanpela hap we mipela i ken lukluk long ol toktok bilong disiplineri.

"Olsem Komisina, mi amamas olsem

karikulum i bungim ol skul toktok wantaim inap taim.

Mi tok orait long ol pepa ol i givim na ol wok bai go bek gen long Deputi Komisina Edministresen, Asisten Komisina Humen Risos na Trening Ko-

manden long kolis.

"Ol skul toktok insait long dispela buk bai skulim ol bihain polis opisa bilong yumi na mi tok tenkyu long wok we AFP Opisa na Bomana Polis Kolis Opisa i mekim.

"Mi strong ol tim namel long Bomana long ol i wok wantaim na kamap wantaim dispela nupela tingting long gutpela bilong ogenaisesen long bihain taim," Komisina Baki i tok.

Em i tok moa olsem dispela em i stat bilong mekim konstabuleri i kamap nupela. Em i gat bikipela plen i stap we em bai putim konstabuleri long gutpela rot long winim ol driman konstabuleri i gat long en.

Enga Provinsal Haus sik Kontrak i redi

GAVANA Jeneral bilong Papua Niugini, Gren Sif, Sir Michael Ogio, Governor General i bin go pas long lukim saining bilong wanpela bikpela kontrak bilong kisim mani long wokim nupela Enga Provinsal haus sik.

Gren Sif, Sir Michael i bin makim gavman long tok orait long dispela kontrak wantaim Saina Exim Benk.

Mani mak bilong dispelakontra we Sir Michael i bin sanim

em, US\$159,600,000.00, we namba wan hap bilong mani long kirapim wok em bai Exim Benk bilong Saina bai putim 85 pesen (%) na PNG nesenel gavman bay putim 15 pesen (%).

Nupela Enga haus sik em i stap long level 5 olsem wanpela riferel haus sik na em bai gat ol klinik sevis wantaim jeneral marasin, na klinik bilong ol lain i gat hevi long tingting bilong ol,

ai klinik, dentis klinik na sejeri, anestetik, patoloji, redioloji na seksual helt sevis.

Em bai gat 180 bet long ol sikman i slip na 12-pela yunit bilong ol mama inap slip long kisim bebi na bihain long ol i karim pinis long stap na givim susu long ol bebi i liklik tumas na stap long neseri.

Wanpela hap bilong dispela kontrak em i bilong kirapim ples slip bilong ol wokman na wokmeri.

Kontrak bilong kirapim dispela haus sik em gavman i givim long Guangdong Foreign Construction Co. Ltd. Man i makim kampani, Zhao Guanghua William na Xiaoshe Lu i bin stap long lukim ol i sainim dispela kontrak wantaim Seketeri bilong Helt Dipatmen, Pascoe Kase.

Gavana bilong Enga Sir Peter Ipatas tu i bin stap long dispela sainim seremoni.



L-R Seketeri bilong Helt Dipatmen Pascoe Kase i sainim kontrak bilong kirapim Enga haus sik wantaim tupela mausman bilong Guangdong Foreign Construction Co. Ltd, Zhao Guanghua na Xiaoshe LU. Poto: Gavman Haus midia.

Helt wokman na meri kisim malnutrisen trening



Trena Laura White i toktok long ol lain i stap long trening insait long Modilon Jeneral Hausik autpesen eria bilong ol pikinini.

MALNUTRISEN em i wanpela sik we i wok long hait na kilim ol pikinini wantaim ol narapela bikpela sik olsem malaria, dairia o pekpek wara na numonia.

Tasol ol pipel i no save luksave olsem em i wanpela sik we inap long kamapim dai na olsem ol helt woka i mas sekim na givim toksave o marasin long daunim dispela sik.

Malnutrisen i save kamap long kain, kain wei na i no long taim i

no gat gutpela nutrisen o kaikai tasol. Malnutrisen inap kamap long ol kain samting olsem no gat gutpela ples bilong toilet, o no gat gutpela rot bilong klin wara, ples bilong wasim han na planti narapela samting moa," Dokta bilong ol pikinini, Dokta Aipit bilong Modilon Jeneral Haus sik long Madang.

Dr Aipit i bin toktok long taim em i kisim prektikal trening bilong ol 20 helt save-man na meri long autpesen klinik bilong ol pikinini na long inpesen wod long taim bilong wanpela wik trening bilong Strongpela Malnutrisen Menesmen (SAM) long Madang.

Ol dispela 20 wokman na meri we 12-pela i bin man na 8-pela em ol meri. Ol i bin kam long ol distrik bilong Madang Provins we Bogia i bin salim 12-pela, Sumkar 5-pela, na tripela long Usino-Bundi Distrik.

Ol i lainim wei bilong luksave long ol pikinini husat i gat strongpela kain malnutrisen o SAM na tu long save long wanem kain mak bilong malnutrisen wanpela pikinini i gat olsem em i strongpela, i no strongpela o em bai i no inap pinis hariap. Ol i kisim ol mak wantaim kain samting olsem sekim longpela bilong

pikinini, sais bilong han bilong em, long save long mak bilong sik.

Ol i lainim long ol wei bilong laukautim pikinini i gat SAM, taim bilong givim ol marasin olsem sik pikinini long haus sik na long givim marasin long taim ol i stap long ausait na kamap long aut pesen tasol. Ol i lainim tu 10-pela step long menesim, spesel we bilong givim ol spesel kaikai olsem 'Plumpy Nut', wanpela kaikai i gat pinat bata long en wantaim suka, oil, susu wantaim vitamen na mineral long stretim pikinini husat i gat strongpela malnutrisen tasol i no mas stap long haus sik.

Dokta Aipit i tok moa olsem ol helt wokman na wokmeri mas no ken lukluk long givim marasin tasol. Ol i mas save tu long ol narapela samting we i save kamapim dispela sik. Ol i yusim ol bod bilong sekim longpela bilong pikinini, fut skel na ol tep mesa.

Dispela trening em i kamap long wok bung bilong Volanteri Sevis Ogenaisesen (vso) Intenesenel, wantaim Modilon Jeneral Haus, seksen bilong ol Pikinini na Distrik Helt Edministresen wantaim helpim i kam long World Vision PNG aninit long Matnenel Nubon Pikinini Helt (MNCH) projek bilong en.

Australia luksave long Wol Malaria De

OL wokman na wokmeri bilong Nesenel Dipatmen bilong Helt, wantaim ol opisa bilong Saina Embesi na Australia Hai Komisen i bung wantaim ol narapela developmen patna na ol pablik long mekim luksave long Wol Malaria De long Tokarara Klinik long stat bilong dispela wik.

Saina na Australia gavman wantaim Nesenel Dipatmen bilong Helt i save sapatim wok bilong PNG long daunim sik malaria insait long kantri, aninit long patnasip, Australia-Saina-PNG Pilot Wok Bung long Malaria Kontrol Projek.

Dispela K8 milien projek long tripela yia bai strongim wok bilong ol tripela kantri long kamapim strong wei bi-



Ol patna - Australia-Saina-PNG Bung Wantaim tim. (L-R) Andrew Dollimore, Fes Seketeri bilong Helt long Australia Hai Komisen, Pascoe Kase, Nesenel Helt Seketeri na Yumeng Chu, Atase long Saina Embesi.

long sekim malaria na risets long PNG. Wantaim projek, Australia na Saina saientis na risets opisa i wok wantiam PNG Sentral Pablik Helt Leboratori na PNG Insti-

tiut bilong Medikal Risets we bai ol inap long sekim gut malaria long kantri.

Pascoe Kase, Seketeri bilong Nesenel Dipatmen bilong Helt, i tok

em i gutpela taim bilong PNG long wok wantaim ol pren long Australia na Saina long pinisim malaria gut na bungim olgeta wok we i kamap pinisi long nesenel

malaria strateji long ol yia i go pinis.

Yumeng Chu, Attache long Saina Embesi na Adnrew Dollimore, Fes Seketeri bilong Helt long Australia Hai Komisen i tok amamas long ol wokman na wokmeri bilong Nesenel Dipatmen bilong Helt na NCD Helt Sevis long ol awenes matiriel na ol wok we ol i mekim long Tokarara Helt Klinik.

Ol i lukim olsem "Wol Malaria Dei em i bikpela sans long skulim ol pablik long wei bilong testim malaria, givim marasin na long bihainim wokabaut bilong malaria. Em i givim sans tu long soim wanem kain wok PNG Nesenel Malaria Kontrol Program i wokim pinis long daunim rot bilong malaria i kalap i go i kam long ol pipel long kantri.



Yut, Meri na Famili

Pastor
Barbara Lunge

Lotu long God bai bringim helpim long heven i kam

LAIP bilong yu nau em i stap long tudak o laip bilong yu i no stap gut? Ating yu laik mekim wok bilong God tasol yu no lukim wanpela rot i op long yu? Ating yu i no kisim wanem samting yu laikim long laip bilong yu, wok o skol bilong yu?

Paul na Silas i bin stap insait long kalabus wantaim sen bikos tupela i bin helpim wanpela meri we spirit nogut bilong moran snek o spirit bilong sanguma i bin kalabusim em.

“Long wanpela de mipela i wokabaut i go long ples bilong mekim prea, na wanpela wokmeri nating i bungim mipela long rot. Dispela meri i gat wanpela spirit i stap long en, na em i save tokaut long ol samting bai i kamap bihain. Olsem na ol bosman bilong dispela meri i save kisim planti mani long wok dispela meri i save mekim.” Aposel 16:16

“Orait dispela meri i bihainim Pol na mipela, na em i wok long singaut olsem, “Ol dispela man ol i wokman bilong God Antap Tru. Ol i save tokim yupela long rot bilong God i kisim bek yupela.” Aposel Acts 16:17.

Paul i pre na larim dispela meri i go fri. Tasol ol i wipim Paul na Silas nogut tru, na pasim tupela wantaim sen na lokim ol long kalabus. Long nait, taim tupela i wok long pre na singim song long presim God, graun i Guria strong tru na olgeta dual bilong haus kalabus i op.

“Long biknait Pol tupela Sailas i wok long beten na mekim son long God. Na ol arapela kalabus i harim i stap.” Aposel 16:25.

Ol pren! Dispela taim i olsem nau we yumi stap long nait na bikpela tudak long laip bilong yumi. PNG i lukim taim bilong politik bilong yumi we pasin korapsen i kamap bikpela tru na em tanim han bilong na mekim ol i pret long toktok na ol i bosim ol lida. Ol lida i kisim toktok long ol dispela lain. Tasol taim yumi pre, singim song na litimapim nem bilong God, as bilong nesen bai sek na ol dispela lain husat i holim mani bilong ol pipel bai larim i go long han bilong ol bilip manmeri husat bai skruim Kingdom bilong God i go yet.”

“Mi Bikpela mi gat olgeta strong, mi tok olsem, i no longtaim na bai mi mekim ol samting i stap long skai na long graun na long solwara i Guria moa yet. Bai mi mekim ol gavman bilong olgeta kantri tu i guria. Na ol manmeri bai i kisim planti mani samting bilong ol na bringim i kam long dispela ples, na pulimapim long haus bilong mi. ol silva na gol i stap long olgeta kantri, em i bilong mi tasol.” Hagai 2:6-8.

Isa 24:1-2 “Bikpela bai bagarapim tru graun na graun bai i stap nating. Em bai i krungutim na tanim tanim nabaut graun na graun bai i kamap narakain olgeta. Na em bai i mekim ol manmeri i ranawe i go nabaut. Maski ol i wanem kain manmeri, olgeta bai i bungim wankain hevi. Ol pris wantaim ol manmeri nating, na ol bos wantaim ol wokboi na wokmeri nating bilong ol, na ol bisnismen wantaim ol man bilong baim ol samting long ol. Na ol man bilong givim dinau wantaim ol man bilong kisim dinau, na ol maniman wantaim ol rabisman, olgeta wantaim bai i painim taim nogut.”

“Yumi mas bosim graun bilong yumi wantaim ol samting i stap long en na ol pipel na lukautim ol.” Buk song 24:1.

Ol pkinini man bilong Kingdom i mas painim kingdom bilong God na stretpela pasin bilong en tasol. “Na Moses i tok moa olsem, ‘Sapos yupela i bihainim tok bilong God, Bikpela bilong yumi, na bihainim gut olgeta lo bilong en nau mi givim lng yupela, orait em bai i givim biknem long yupela na bai yupela i winim olgeta arapela lain pipela long graun. Yupela i mas bihainim tok bilong God, Bikpela bilong yumi, na bai em i givim yupela olgeta dispela gutpela samting.” Lo 28:1-2

God i laikim yumi long harim tok na yumi ken kamap gutpela menesa bilong ol samting long graun em i givim long yumi.

Arawa Peris Interim Katolik Womens i redi long Our Lady of Fatima

Eleanor Maineke i raitim

BOGENVIL Daiosis i wok long wok redi long kamap bilong Our Lady of Fatima long mun Septemba long dispela yia wantaim ol dinari insait long Bogenvil daiosis i go pas long ol wok redi rere long kamap bilong Mama Maria.

Katolik Sios i bin makim dispela yia olsem yia bilong marimari o mesi. God em i papa bilong marimari, olsem na em i bin salim pikinini bilong em Jisas long kisim bek yumi ol sin manmeri bilong ples graun.

Insait long Arawa peris, interim Katolik Womens Asosieisen (CWA) i bin gat wanpela miting long Sande Epril 10 long toktok long ol wok redi bai i kamap insait long peris.

Sialedi bilong Interim CWA, Lucy Travertz, i bin strongim toktok bilong Padre Sylvester husat i bin wokim Misa long Arawa Peris long Sande.

Em i bin tok olsem, “I gat tripela bikpela velyu yumi mas prektisim. Dispela em long bilip,prea na pasin bilong yumi.”

Long wankain taim, insait long Bogenvil Daiosis, Bisop Bernard Unabali i bin blesim tripela mein holi dua bilong soim na givim ol Kristen manmeri long luk-



Sialedi Misis Lucy Traverts long miting bilong ol Interim CWA

save long marimari bilong God.

Makim Sentral dinari, holi dua i stap long Arawa Peris i makim Saut Bogenvil em i stap long Buin Taun Peris, na makim Not em i stap long Kokopau Peris. Hahela em i bilong daiosis.

Dispela ol ektiviti i bilong strongim bilip bilong ol manmeri bikos planti kainkain hevi tu i wok long kamap insait long famili, ol komyuniti na long Ailan Bogenvil yet.

Holi Dua long Arawa peris, Our Lady of Mercy. Dispela em bilong ol Katolik manmeri insait long Sentral Dinari. Piksa: Eleanor Maineke



Stori na Wok

– Elizabeth Cox

Toksave: Sapos yumi askim ol manmeri long ples ol i save kaikai wanem samting, planti bai i gat wankain bekim. Sampela bai kolim yam o mami, sampela bai kolim taro o kaukau. Planti bai tok olsem “na wanem? Saksak i bun!”

Sapos yu sindaun long ples bai yu lukim olsem i tru olsem nau, long dispela taim planti manmeri i save kaikai nating saksak o yam o mami o kaukau. Long sampela hap abus i sot bikos planti taim ol man i save wokabaut wantaim sotgan. Sampela ol i sot long pis bikos, wara bilong ol i bagarap o ol manmeri i les. Sampela i nogat gutpela gaden kaikai we ol i ken painim gutpela bin, kumu, sayor na frut. Sampela ol i sot long graun, ol i bin pin-

Yumi Kaikai Wanem Samting

isim ol graun long planim kes krop (cash crops) tasol.

Sapos yumi kaikai strongpela kaikai tasol olgeta taim, na i no gat planti kumu, bin, abus, o frut, em bai yumi i no inap long kamap gutpela na strongpela. Yumi mas i gat ol dispela kainkain kaikai long gro, na banisim o stretim sik na sua.

Ol Meri Inap Long Mekim Wanem

Ol meri ol i mas klia long wanem i gutpela long planim kaikai ol kumu, bin na prut.

Saksak o yam o kaukau i save wokim wanpela wok tasol long bodi bilong yumi. Ol i save givim bensin long bodi long wokim wok. Bun na masol na blut i no inap kamap gut sapos yumi kaikai tasol ol dispela strongpela

kaikai. Rais em i wankain. Sapos yumi kaikai nating rais bai bodi i no inap strong na daunim sik. Long dispela mani yu no inap kisim stua kaikai i gtupela nutrisen kaikai inap long kisim ples na wokim wok bilong gutpela gaden kaikai.

Olgeta meri mas tingting gut long planim kumu bin na frut long gaden bilong ol olgeta taim. Sapos yu bihainim gut ol nupela we bilong wokim gaden yu ken planim olgeta taim na bai yu inap dispela kain gutpela kaikai long olgeta de, maski draiwara, bai kumu na bin i stap yet. i gutpela tru sapos gaden kumu, bin na frut i stap klostu long ples na haus bilong yu. Wanem taim yu laik kuk, bai yu kisim tasol ol samting klostu na wokim

kaikai i gat tripela kain kaikai olgeta taim.

Sapos ples bilong yu i gat planti kopi o kopra klostu na gaden kaikai i stap longwe moa, planti taim bai yu les long painim gutpela kumu na bin bilong kuk.

Sapos ol grup meri ol i wok gut wantaim, ol inap long wokim wanpela gutpela grup gaden we ig at dispela olgeta gutpela samting. We sampela de ol mamam ken painim kaikai long dispela gaden sapos ol i no go long bikpela gaden.

Sapos ol meri bung na wokim nutrisen gaden, i gutpela long planim ol dispela kain kaikai tasol, bikos planti taim ol i gat inap strongpela kaikai long kaikai, na ol i sot tasol long dispela ol narapela gutpela kaikai.

O'Neill wanbel long pasim Manus ditensen senta



SUPRIM Kot i tokim gavman bilong Australia na PNG long pasim rijonal prosesing senta long Manus Ailan.

Dispela em i disisen bilong 5-men bens bilong Suprim Kot long PNG long dispela wik Tunde.

Gavman bilong Australia na PNG bai no moa abrusim dispela kot oda tasol tupela bai bihainim dispela kot oda na pasim Manus ditensen senta.

Praim Minista Peter O'Neill i wanbel pinis long pasim dispela ditensen senta. Em i tok PNG gavman i wanbel long disisen bilong Suprim Kot na ol i redi long pasim dispela senta.

Tasol Mista O'Neill i tok sampela ol liklik bisnis manmeri long Manus, husat i wok long mekim bisnis long dispela senta, bai kisim taim.

Em i tok wok nau em long givim taim long gavman bilong Australia long stopim sampela moa wok, na salim ol asailum sika manmeri i go bek long Australia.

Tasol sampela taim ol memba na lida bilong PNG i save giaman. Planti bilong yumi i ken ting olsem ol lida i mekim tok tru.

Sapos ol i senisim plen na mekim sampela samting long opim gen dispela senta, bai yumi mekim wanem? Bai yumi go bek gen long kot?

Husat bai westim bikpela mani long haiarim loya na kot gen long Suprim Kot?

Yumi mas save gavman i gat



namba long flo bilong Palamen na ol i ken mekim wanpela samting long larim dispela senta i op yet.

Wanpela samting PNG gavman i ken mekim long larim dispela asailum prosesing senta i stap yet em sapos Palamen i yusim namba bilong memba husat i stap long gavman sait, na kamapim wanpela nupela lo long givim tok orait na

larim Manus asailum prosesing senta i op yet.

Maski planti samting i no bin stap stret taim PNG na Australia i bin opim dispela senta long putim ol asailum sika manmeri, nau yumi mas save olsem gavman i ken mekim nupela lo long flo bilong Palamen Haus.

Ol asailum sika manmeri tu i bin

les long kam long Manus na statim nupela laip long PNG, olsem planti bilong ol i bin tok aut pinis.

Sapos PNG gavman i laik strongim kona long larim Manus prosesing senta i op yet, gavman i ken yusim namba long flo bilong Palamen Haus long kamapim wanpela bil na pasim dispela bil long larim em i kamap lo.

Gavman i gat namba long Palamen long mekim dispela nupela lo. Na wok bilong ol Memba em long mekim lo.

Sapos gavman i mekim dispela nupela lo, no gat wanpela man bai stopim. Bikpela samting dispela lo mas bihainim mama lo na sampela ol intanesenel konvensen na protokol.

Dispela lo ken kamap olsem wanpela as long givim tok orait long PNG i kisim i kam ol asailum sika na larim Manus prosesing senta i op yet.

Tingting bilong ol asailum sika manmeri i stap long Australia bikos ol i bin lusim kantri bilong ol, brukim solwara na kam long go stap long Asustralia. i no long PNG.

Planti ol asailum sika manmeri tu i autim tingting olsem ol i les long stap long PNG. Suprim Kot i luksave long dispela tingting bilong ol asailum sika manmeri.

Ol i laik go stap long Australia na ol i kam tasol anit long wanpela agrimen namel long PNG na Australia, gavman bilong PNG i helpim

gavman bilong Australia long rausim ol dispela manmeri long graun bilong Australia na kam long PNG.

PNG i gat planti samting we gavman i mas stretim. Planti ol yangpela manmeri i raun nating long strit na sampela i stap nating long ples.

Planti ol i smukim spak brus na dring hom bru. Planti yangpela meri i lukim olsem laip i hat na ol i wok long kamapim pasin pamuk.

Dispela em ol sampela bikpela hevi i stap long kantri we gavman bilong PNG i mas stretim. PNG i no ken putim intres bilong Australia i go pas na lus tingting long intres bilong em yet.

Suprim Kot i mekim dispela disisen long opim ai bilong ol memba na lida long mekim samting stret.

Dispela kot disisen i nau opim ai bilong PNG long gavman i no ken mekim samting long laik bilong em yet.

Ol lida i wok long brukim planti lo na mekim samting long laik bilong ol yet. Dispela kain pasin i no ken kamap.

Ol i mas bihainim Mama Lo na arapela ol lo bilong kantri. PNG i karim hevi bilong Australia taim em yet i gat planti hevi long karim.

Suprim Kot i mekim gutpela disisen na dispela disisen mas karim gutpela kaikai. Pasim Manus asailum prosesing senta.

Katolik Profesenel Sosaiti i wanbel long Suprim Kot disisen long Manus

DISISEN bilong Suprim Kot long ol Asailum Sika long Manus em i bikpela win long jastis na mama loa bilong dispela kantri, Presiden bilong Katolik Profesenel Sosaiti (CPS), Paul Harricknen i tok.

"Dispela em i bikpela win tru long jastis na Mama Lo bilong yumi i mas oltaim stap bos na i go pas long givim stia long dispela kantri.

"Stat yet long yia 2002, ol pastaim gavman bilong PNG i no wok long givim gutpela luksave long Mama Lo na ol arapela lo bilong PNG, na ol i tok yesa long Gavman bilong Australia long sekbuk diplomesi, o long kisim mani," Mista Harricknem i makim sosaiti na i tok.

Em i wokim ol dispela toktok bihain long Suprim Kot na 5-pela jas olsem Deputi Sif Jastis Sir Gibbs Salika, ol Jastis Sir Bernard Sakora, Ambeng Kandakasi, Don Sawong na Terence Higgins i bin wokim disisen long dispela wik Tunde olsem Manus ditensen senta bilong ol asailum sika o ol refuji we Australia i putim ol long hap na wet pastaim long stretim ol pepa bilong ol i no stret na i no bihainim Mama lo bilong PNG. Dispela em bikos em i brukim ol rait na fridom bilong ol asailum sika husat i laik go long Australia, tasol Australia i les na i wok long fosim ol na salim ol i kam long Manus na PNG. Olsem, na ol jas i odaim tu-

pela PNG na Australia gavman long mekim ol samting na pasin dispela prosesing senta.

"Disisen bilong Suprim Kot em i win bilong ol asailum sika na Mama Lo bilong PNG," Mista Harricknen i tok.

Em i tok stat yet long yia 2012 we gavman bilong Australia na PNG i bin wokim dispela dil long yusim Manus olsem ditensen senta bilong ol asailum sika bilong ol narpela kantri, Katolik Sios i bin tok dispela i no stret na i no bihainim Mama Lo bilong PNG. Em i tok nau gavman bilong Australia anit long Malcolm Turnbull i no lukluik gut long ol asailum sika, na dispela i kamap klia long

boda polisi bilong ol.

Em i tok i bin gat wari taim PNG gavman i laik kamapim senis long Seksen 42 long Mama Lo bilong inapim intres bilong Australia, tasol gutpela nau Suprim Kot i wokim disisen egensim operesen bilong Manus Asailum sika ditensen senta.

Em i tok no gat kantri long wol bai senisim Mama Lo bilong em long inapim askim o laik bilong narapela kantri.

"Gavman i mas nau lainim lesen long dispela disisen na go het long pasim senta. Tu, kisim ol lain husat i wokim asua long bagarapim meri na kilim dai man long kot i stretim ol dispela," Mista Harricknen i tok.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579 Email: editorial@wantok.com.pg

Pe bilong wanpela yia 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Yumi FM musik awot bai kamap dispela Sarere

BIKPELA bung bilong ol musik man bilong PNG na Saut Pasifik we olgeta manmeri i bin wet long lukim, bai kamap long dispela wiken.

Namba 12 Yumi FM Digi-cel PNG Musik Awots bai kamap long dispela wik Sarere (30 Epril) long Pati Kepital bilong Pasifik, Lamana Gold Club, long Pot Mosbi.

PNGFM bai go pas long dispela bikpela musik festival na ol sapota na fen bilong sampela ol biknem musik manmeri

Dispela festival bai lukim wanpela 18 kategori awot ol i kolim "Lifetime Achievement Awards – o Justine Hansu Kili Awards," we ol i kamapim long givim luksave long ol musik manmeri husat i go pas long promotim lokal kontemporari musik.


Dispela laiptaim awot i bin kamap bihain long wanpela biknem redio man, leit Justin Hansu Kili, i bin sapotim na promotim musik indastri bilong PNG i go antap moa long narapela level.

Long laiptaim bilong em, em i bin promotim musik taim em i bin wok olsem biknem radio man long PNG.

Man husat i go pas long dispela musik awot em i Kasty bilong Yumi FM. Kasty em i wanpela biknem redio man bilong Yumi FM, na em i bin go pas long Yumi FM musik awot long yia 2005 i kam inap nau.

"Dispela yia, mipela i amamas long givim luksave long wanpela long taim musik man. Nem bilong en em Ben Wainetti – em i fran men bilong TMC ben (Tamate Memorial Sios singas) bilong Daru, Westen Provins, husat i bin senisim sampela samting long gro bilong musik indastri long PNG insait long las 42 yia ," Kasty i tok.

Mista Wainetti em i wanpela bilong planti manmeri husat i bin senisim tingting na laip bilong planti ol yangpela manmeri long Daru wantaim promotim em i save mekim long strongim PNG musik long Tores Streit na sampela hap bilong



Ben Wainetti

Noten Teritori long Australia.

Em i save mekim dispela ol promotim bilong PNG musik long laik bilong em yet tasol Yumi FM i painimaut pinis na em bai kisim awot.

"Em i rait taim long givim luksave long wok bilong em

long promotim musik na helpim ol yangpela manmeri long kirapim tingting long musik."

Long dispela wankain kategori, em i the Hall of Fame Award, we dispela awot bai go long ol biknem musik man, husat i save sapotim ol yangpela manmeri na ara-



Basil Blitz Greg

pela ol olpela musik manmeri long stretim gut stail bilong musik long laik bilong ol yet stret.

"Biknem musik man, singa, saun enjini na man bilong raitim ol song, Basil Blitz Greg, em i mipela i laikim em long kisim dispela awot.

"Musik bilong Basil i kamap namba wan tru na planti ol manmeri long PNG na Saut Pasifik i save laikim ol song bilong em," Kasty i tok.

Mista Greg i bin helpim

planti ol nupela musik man aninit long Swamp Sound Studios long Balimo, Westen Provins, long kamap gutpela musik man long kantri.

Basil Greg i gat rekoting studio bilong em yet long ples bilong em long Lese Oalai long Galp Provins na nem bilong dispela stidio em i Touora Muzik Studio.

Ol i salim ol tiket bilong dispela musik festival Lamana Hotel na long Paradise Cinema long Vision City.



Kasty bilong 93 Yumi FM i givim ol fri tiket long tripela laki wina bilong Digi-cel long Pot Mosbi las wik. Ol bai gat sans long go lukim Yumi FM Digi-cel PNG Musik Awot nait long Gold Club dispela Sarere.

Digicel kastoma ken kisim fri tiket long go lukim Yumi FM Musik Awot

OL pripeid kastoma bilong Digi-cel long Pot Mosbi i gat sans long go lukim namba 12 Yumi FM Digi-cel PNG Musik Awot nait bikos 33 pesen Mo Data Promosen bilong Digi-cel bai helpim ol kastoma i kisim sans long winim fri tiket.

Ol mobail kastoma i ken baim ol data pas long wan de, wan de sosel, tri de sosel, o 7 de sosel pas long kisim 33 pesen mo data na

long kisim sans long kisim fri tiket long go lukim dispela bikpela bung bilong ol musik man long PNG na Saut Pasifik.

Wankain promotim em i bin kamap long taim bilong Digi-cel Kap lonsin long Pot Mosbi na taim Digi-cel Kap i bin kikstat long olgeta hap long kantri.

Planti ol kastoma bilong Digi-cel bai gat sans long winim fri tiket long go lukim


namba 12 PNG FM Digi-cel Musik Awot long dispela Sarere long Gold Club, Lamana Hotel long Pot Mosbi.

Klostu long dispela awot nait, sampela moa kastoma bai kisim fri tiket.

Bos bilong konsiuma long Digi-cel, Khatarr Fehmi, i tok dispela kain planti promotim bai kamap long dispela mun long panti ol senta long PNG.



Em nau! Ol pikinini i ken painim rot i go long ples wantaim Wantok lain...



STORI BILONG TUMBUNA



Bipo tru i gat tupela lapun manmeri i stap long wanpela ples. Tupela i gat wanpela pikinini man nem bilong Pembu.

Pembu i no save slip wantaim papamama long haus. Em i save slip long bus na kilim ol kapul na pisin, na em i save kisim i kam long tupela lapun. Wanpela de Pembu i kam long haus na i harim planti man i tok tok long haus, na askim ol, husat man i kam i stap? Em i go insait na em i lukim wanpela bikpela man i kam i stap. Pembu i tok papa wanem taim yu kam? Dispela bikpela man i tok, plis gutpela man, wanpela man longples i kisim spia long hat bilong em na no gat man i ken rausim spia. Tasol mi harim yu save tru long katim man na rausim spia na mi kam kisim yu.

Tupela papamama bilong em i harim na i no laik tru long Pembu i go wantaim dispela man, tasol Pembu i strong tumas long go. dispela bikpela man i amamas, em i ting bai em i kaikaim Pembu, long wanem em i gat planti bilas. Nau Pembu i bilas gut na putim sampela kangal bilong pisin long het bilong em na go wantaim dispela bikpela man. Tupela i go kamap long wanpela ples i gat bikpela banis bilong man i stap long kaikai man i stap insait bilong kilim na kaikai. Ol lain bilong dispela man i gat retpela skin na em tasol i gat braunpela skin. Nau Pembu i go insait long haus we ol arapela man na meri i stap bilong kaikai. Ol manmeri i lukim Pembu na ol i sori long em. Pembu i tok, em i kisim yupela i kam olsem wanem? Ol i tok, em i kisim mipela i kam olsem em i kisim yu i kam. Pembu i tokim ol, yupela i no ken wari. Ol i slip, na long biknait Pembu i mekim wanpela driman na lapun meri i tokim em olsem, yu kisim tripela pisin gras na putim long het bilong yu. Wanpela yu putim long as bilong yu na tupela yu putim long tupela han bilong yu, na yu traim flai. Em i traim flai na man, em i ken flai olsem pisin. Em i kirapim ol manmeri na givim tripela – tripela gras pisin long ol. Ol i brukim haus na flai bilong Pembu, na em i salim ol i go bek long ples bilong ol. Ol manmeri i amamas na tok em i gutpela man tru. Ol pipel i harim dispela stori na ol i save pret tru long ol man i gat retskin. Taim ol waitman i kam nambawan taim long ol Hailans ol i pret nogut. Nating ol waitman i save kaikai man.


PAINIM WOD PILAI

Ol wod lista:

- | | | |
|-----------------|----------------|-------------------|
| DRIMAN | HALIVIM | LAITIM |
| EMTI | HETWIN | LOMBO |
| ERAMAUT | IAPAS | MANANGUNAI |
| FAILIM | IVNING | METAIM |
| FOTNAIT | JERM | NIUSPEPA |
| GIRIGIRI | KIVUNG | OLAPUKPUK |
| GUMA | KOKOROS | PESTODE |

I I D S P A N X W K M B N R C M V E G O L S R V B
 B E P F H A A W D C E H M C F S F I P I Y I S T I
 S G G T R S B M Q A Q A A N I A S K T B U O U P L
 E M C L L C Q E U E P A I I Z E X O H I S L H S G
 A E T R D A B O L E A U S A I T G O A O N E S N O
 E O Z G A M R C S O Y M O N G N N S R D T G S H F
 L U M T A A E G D I I E E O I A U O S N V N R I M
 O T E H J E T Z M L K O E N F B K I O M J N H A R
 M Y E S C L F G H A L I V I M O T E E O P T T E L
 B O Y K R X J H P I P I V A K L A E T R R U E Q H
 O I S E P V P E S T O D E U O P T O S H J N I E L
 N F K A X Z P T R I D T P G N A O I H E N A I Z G
 M O F D S S G W J M N K Z U M G S V V X D O V H T
 S E O W U G G I E E U A A M S A R O N O E P T Y E
 E M T I F A E N R P A M O A S O N G G G E R W F R
 M A N A N G U N A I G D I A P A S T E T C E Y A P
 I M A V I M F L M N G L S E M R I L W H R O L E E
 F A I L I M O O A B T I Y I T T I E C O B A M Z O
 E C T P L G J P U O E R R T P W B F I N E J O K E
 P S M W G B T Q T S D D S I Z L E A T C R Q D G V

Ansa bilong Wod Pilai isu 2171



Ileksen long Serbia: Praim Minista Vusic i sapotim EU sapos PM i winim ileksen



Nau Praim Minista bilong Serbia, Aleksandar Vucic i putim vot bilong em long Kapitel siti, Belgrade. Foto : ABC

PRAIM Minista bilong Serbia husat i sapotim Yuropiern Yunien (EU), PM Aleksandar Vucic, i win long jenerel ileksen. Pati bilong em i bin winim 50 pe sen long ol vot. Em i tok ol pipel bilong Serbia i bin givim bikpela sapot long winim dispela ileksen na go pas long gavman. Pastaim, Mista Vucic i bin putim askim i go long pablik long givim sans long gavman bilong em long kam bek na

skruiem ol rifom i mas kamap na kantri i ken joinim EU. Ol Soselis i kamap namba tu wantaim 13 pe sen na ol Nesenelis Redikel pati we i gat gutpela poroman wantaim Rasia, i kamap namba tri wantaim 7 pe sen. Lida bilong dispela pati, Vojislav Seselj, inap go bek long palamen bihain long kot long Hague i bin rausium ol sas bilong em long ol woa kraitim. Dispela pati tu i egen-sim Serbia i kamap memba

bilong EU. Bihain long em i putim vot bilong em, Mista Vucic i bin tok em i hop vot bilong ol pipel bai sapotim EU. Sampela memba bilong pablik i tok ileksen long kantri i wok long kamap klostu klostu na ol i hop bai sampela gutpela samting olsem kamapim moa wok bai kamap. Dispela em i namba tri nesenel ileksen bilong Serbia insait long tripela yia.

Presiden Sisi i tok strong long ol pipel i sapotim stet

PRESIDEN bilong kantri Ijip, Abdul Fattah al-Sisi, i tok strong long ol pipel bilong Ijip bihainim ol plen long holim ol anti gavman protes. Presiden Sisi i kamap long TV na tok sapos kantri i yunait na stap, ol wok long kamapim hevi long kantri bai no inap kamap. Ol i strongim sekyuriti long kantri na givim aut tok lukaut olsem ol bai no inap isi long ol lain i wokim protes. Planti bel kaskas i kamap long dil we Ijip i givim tupela ailan long Red Si i go long Saudi Arabia. Presiden Sisi i tok tupela ailan, em long Sanafir na Tiran, i bilong Saudi Arabia yet. Ol sekula leftis i plenim protes mas long dispela wik na dispela i egensim, lo i stopim o protes mas long kantri we i nogat tok orait long en. Ol protesta i laik holim protes mas long pablik holidie taim we i makim anivesari Israel i bin lusim Sinai Peninsula long 1982. Presiden Siri i tok em i lukim olsem ol pipel i wok



Long TV, Mista Sisi i bin wokim tok lukaut long ol ivil fos o ol man no gut i wok long plen egensim Ijip. Foto: ABC

long singaut long trabel na bagarap long sefti na sekyuriti bilong kantri na em i tok ol ivil fos i wok long mekim ol plen long bagarapim kantri. Ami i redi pinis long ol sampela hap bilong ol bikpela siti sapos trabel i kamap. Ol ripot i tok pablik i no amamas long Presiden Sisi bikos ikonomi bilong kantri i no go gut na tu, ol sekyuriti fos i wok long kamapim ol bagarapim nating nating. Presiden Sisi pastaim i bos bilong Ijip ami na em i bin kamap bos bilong kantri

taim ol i rausim Presiden Mohammed Morsi husat i eks Muslim Bratahud opisel long 2013 biahinim ol bikpela protes. Stat long dispela taim, Ol i kilim pinis moa long 1,000 pipel na ol i kalabusim samting olsem 40,000 pipel long kamapim trabel. Planti bilong ol em ol memba bilong Muslim Bratahud. Ol lokol na intanesenel humen rait grup i tok Ijip nau i go no gut tru long sait bilong bagarapim ol rait bilong man, na i go bek long "Polis Stet."

Post Brexit dil inap kisim 10-pela yia, Obama tok



Presiden bilong Amerika i bin pilai golf wantaim David Cameron long las Sarere. Foto: ABC

YUNAITET Kingdom o Briten inap kisim 10o-pela yia long negosietim ol tred dil wantaim Amerika sapos em i lusim Yuropoien Yunien (EU), Presiden bilong Amerika, Barack Obama, i tok. Em i tok sapos Briten i

lusim EU, strong bilong em long wol bai no bikpela tumas. Toktok bilong Presiden Obama i mekim sampela lida bilong Briten i kros na i tok toktok bilong Mista Obama em i pipia toktok.

Pastaim tu, Mista Obama i bin tok UK o Briten bai stap long baksait bilong lista sapos em i lusim EU. UK bai wokim referendum vot long stap wantaim EU o nogat long Jun 23 long dispela yia.

Pret long Japan long kisim hevi long kaikai planti



PLANTI pipel long Japan husat i gat hevi na sik long kaikai i no kisim helpim long ol dokta o long dokta na oil woklain bilong mentel helt, ol ripot long Japan, i tok. Japan Society for Eating Disorders i tok helt sistem i feil long helpim planti tausen pipel long Japan i stap long dispela hevi. Ripot i tok presa long ol pikinini meri i bikpela moa bikos ol i laikim ol meri i mas stap bun natng na i no ken go patpela. Ripot i tok gavman i tok nau em i kamapim moa sevis long dispela eria na em i laik painimaut mak bilong hevi i bikpela o no gat. Wapela meri i gat hevi i tok em i no bin laikim taim em i patpela long liklik bilong em bikos ol narapela pikinini i save mekim pani long en. Na taim em i gat 16 kris-mas, hevi long kaikai i bin stat. Em i stop long kaikai planti na em i strongim sait

bilonbg wokim eksasais. Taim em i gat 19 kris-mas, em i lusim skin stret tasol papamama bilong em i no tokim em wanpela samting, o givim em sampela tok stia. Moa long 10-pela yia bihain, meri ya i wok long kisim helpim long sik o kondisen bilong em. Gavman bilong Japan i tok em i hat long tokaut hamas pipel i gat dispela hevi long kaikai, tasol mak bilong dispela sik em ol i skelim wantaim dispela bilong Ingran. Long 2014, 10,000 pipel tasol long Japan i bin kisim tritmen long dispela sik taim long Ingran, 725,000 i bin kisim tritmen. Populesen bilong Ingran em i haf long populesen bilong Japan. Long japan, i no gat famili riferel sistem we ol lain i stap long dispela hevi i ken go longkisim helpim o painimaut wanem samting i kamap long ol na kisim saikaitrik sapot.

"Medikal sistem i wok long feilim pipel. i stap long dispel; a kain hevi na tu, planti tausen pipel i gat dispela hevi i stap isi tasol. Liklik sevis stret i stap long hel;pim ol lain wantaim kain hevi," Dokta Nishizono-Maher i tok. Gavman i luksave olsem em i gat bikpela salens i stap long han bilong em. Bikos planit lain i save go long haus sik taim sik i go no gut tru, gavman bilong Japan nau i mekim ol edukesen awenes program na tu, em i laik kamapim moia sevis long helpim ol lain i gat dispela sik long kaikai. Narapela bikpela wari em i presa we planti pikinini meri na ol meri i bungim long stap bun nating bikos long lukluk long dispela taim we "sapos yu bun nating, yu bai luk nais tru." Ol ripot long Japan i tok dispela i abrusim mak bilong en nau na i kamap long mak bilong bungim hevi.

NDA bai gat nupela instrakta bilong Japan



Niugini Dive Adventures daiv senta long Madang Resort. Poto: James G. Kila

James G. Kila i raitim

WANPELA olupela daiv senta long PNG, Niugini Daiv Advensa we i stap long Madang Risot Hotel bai gat wanpela nupela instrakta bilong Japan long soim ol lain long swim o daiv insait long solwara.

Dispela man bilong kantri Japan tu bai wok olsem menesa long senta.

Menesing Dairekta bilong Melanesian Turis Sevises, Sir Peter Barter i tokaut long dispela nupela daiv instrakta na menesa i no long taim i go pinis. Sir Peter i no kolim nem bilong dispela nupela daiv instrakta tasol em i

tokaut olsem dispela man bilong Japan bai muv i kam long Madang long kisim posisen bilong em long mun Julai 2016-4-24.

NDA daiv stua em wanpela olupela daiv senta long PNG we i bin op namba wan taim long yia 1976. Long dispela taim em i bin kamap olsem ples bilong biknem famili ol i kolim ol Cousteau we tupela biknem sip bilong ol tu i bin stap long hap long Madang.

Long dispela taim ol i bin kamapim tripela dokumenteri muvi we i stori long Papua Niugini. Wanpela long ol dispela dokumenteri muvi em ol i kolim 'Ring of

Fire' na dispela muvi i winim planti awot tru long wol muvi festival na planti lain we i save glasim na skelim ol dokumenteri i laikim tru dispela muvi.

Madang Risot Hotel em wanpela hotel we ol turis bilong Japan i save laikim tru long go long en long sait long daiving o glas insait long solwara.

Sir Peter i tok MTS save amamas long bringim ol turis na ol lain husat i no daiv raun long krus sip bilong en Kalibobo Spirit long raun i go olsem long Sepik riva na tu bringim ol raun lukim ol ailan na ol lokal viles long Madang.

Papagraun tok promis long lukautim balus

OL papagraun bilong Aropa ples balus long Sentral Bogenvil i tok promis long lukautim ol balus na wokman bilong PNG Air.

Mausman bilong Kaunsol ov Eldas (COE), Peter Onau, i makim maus bilong lokol level gavman bilong Saut Nasioi konstituensi, na i tok tenkyu long PNG Air i gat bikpela bilip long mekim bisnis wantaim ol pipel biong Bogenvil.

Mista Onau i mekim dispela tok promis las wik Fonde long Aropa plea balus

taim PNG Air i kisim nupela ATR 72-600 balus i go pundaun long Aropa ples balus long Kieta, Sentral Bogenvil.

"Mi makim maus bilong ol Kaunsil ov Eldas na tok tenkyu long PNG Air i laik sevim ol pipel bilong Bogenvil.

"Mipela bai lukautim ol balus na wokman bilong PNG Air. Mipela i opim gen Aropa ples balus bihain long Bogenvil pait I pinis.

"Mipela i laikim sevis na nau mi amamas long PNG Air i kisim sevis i kam long ples. Mipela bai lukautim

ples balus na tu mipela bai lukautim balus na ol samting bilong balus.

"Yu tok promis na tokim yu stret olsem mipela i stap baksait long PNG Air long larim em i givim sevis long pipel na mipela i amamas tru long dispela nupela balus i kam pundaun long Aropa,"Mista Onau i tok.

Mista Onau i tok ol lida na pipel i amamas bikos dispela balus i nupela stret na PNG Air i laik larim ol pipel bilong Bogenvil i yusim dispela nupela balus.

NGE laik raus long POMSoX

WANPELA junia oil na ges eksploresen kampani, New Guinea Energy Ltd, (NGE), i laik raus long Pot Mosbi Stok Eksens (POM-SoX) na em i givim tok save pinis long kamapim voluntari dilisting.

Voluntari dilisting i min olsem kampani we i stap long pablik stok maket bai raus i go au-sait long laik bilong em yet na bai no moa stap long stok maket we ol pablik i ken baim sea na kamap seaholda bilong dispela kampani.

Kampani Seketeri, Justin Mouchacca, i tok NGE i aplai pinis long POMSoX long raus long dispela pablik sea maket, na long 22 Jun 2016, ol sea bilong NGE bai no moa stap long POMSoX.

Mista Mouchacca i tok stat long namel bilong yia 2008, NGE i bin stap long POMSoX, tasol i kam inap nau no gat wanpela bikpela samting i bin kamap na ol investa tu i no bin baim o salim planti sea bilong dispela kampani.

Dispela i lukim NGE i no mekim planti mani long sapatim em yet long stap yet long POMSoX.

NGE i salim pinis wanpela pas i go long olgeta seaholda bilong em long toksave long ol olsem kampani bai raus long POMSoX.

Ol seahola husat laik salim sea i ken salim ol sea bilong ol aninit long PNG rejistri. Tasol ol seaholda husat i laik kamap seaholda bilong NGE yet na ol i les long salim, bai stretim sea bilong ol i go long Australian sea rejistri na kamap seaholda bilong NGE yet.

Long wankain taim NGE i wok long bihainim nupela kopret strateji long painim na glasim gut ol sans bilong mekim moa invesmen.

Long mun Mas kwata, mani balens bilong NGE i sanap K47.51 milien. Kampani i gat dispela mani long ranim ol operesen.

Long 15 Epril 2016, NGE i tok tu olsem ol i mekim wanpela \$3.55 milien (klostu long K10 milien) invesmen long Karoon Gas Australia Limited bilong Australia. Karoon em wanpela oil na ges kampani bilong Australia na i stap long Australian Sekyuritis Eksens (ASX).

Dispela i mekim NGE i kamap 18 pesen seaholda bilong Karoon.

Sif laikim PNG Air long daunim prais

PARAMAUN Sif na papagraun bilong Aropa ples balus insait long Sentral Bogenvil i laikim PNG Air long daunim prais bilong ealain sevis.

Paramaun Sif Joe Taruna i tok ol arapela balus kampani i save sasim bikpela mani long ol pasindia husat i laik go kam long Bogenvil.

Sif Taruna i mekim dispela toktok las wik Fonde taim PNG Air i kisim namba tri nupela ATR 72-600 balus i go pundaun long Aropa ples balus, Sentral Bogenvil.

"Mi laikim PNG Air long tingim mipela ol liklik manmeri long ples na daunim

prais bilong sevis. Ol arapela balus i save sasim bikpela mani na mipela i kisim taim long peim dispela kain bikpela mani long go long Bukam Rabaul na Pot Mosbi,"Mista Taruna i tok.

Mista Taruna i amamas long PNG Air i opim sevis long Buka na Aropa. Em i tok em bai singautim ol asples long givim sekuriti long balus na ol wokman bilong PNG Air.

"Mipela bai lukautim balus na ol wokman bilong PNG Air. Mi tok tenkyu long yupela i kisim dispela nupela balus i kam long ples bilong mi.

"Laikim bilong mi em i wanpela samting tasol. Mi laik askim PNG Air long daunim prais bilong baim balus tiket. Givim mipela gutpela prais long go long Pot Mosbi na Rabaul,"Mista Taruna i tok.

Em I tok ol papagraun i wanbel long PNG Air i kisim dispela nupela balus i kam long Aropa na Buka.

"Mi makim ol pipel na tok tenkyu long PNG Air i tingim mipela na kisim dispela nupela balus I kam long ples.

"Mipela bai lukautim dispela balus na ol wokman bilong PNG Air,"Mista Taruna i tok.



MANILA k1,708*

< RETURN >

Call toll free 180 3444 for more information.

Air Niugini
www.airniugini.com.pg

*Ex Port Moresby. Conditions Apply.

USAID gren helpim ol yut Klaimet Sempion



Poto kepsen: Nupela ol sempion bilong klaimet senis bai givim ol gutpela toktok bilong komyuniti rispons long ol hevi bilong klaimet senis long ol ples bilong ol. Poto i kam long ChildFund

CHILDFUND Papua Niugini i bin givim trening long ol 22 yut olsem ol klaimet senis sempion wantaim sapot bilong Yunaitet Stets Ejensi bilong Intenesenel Developmen (USAID) Pasifik Amerika Klaimet Fan (PACAM).

Ol yut i kam long 12-pela ples na ol lain bilong ol long komyuniti yet i bin makim ol. Ol i bin kisim trening long tingting bilong klaimet senis i save bagarapim ples na wanem ol wei bilong senisim sindaun na long helpim komyuniti long kamapim ol plen bilong ol long lukautim ol ples bilong ol. Ol bai strongim gutpela tingting insait long komyuniti long wok bilong banisim ples long hevi bilong klaimet senis.

Long pinis bilong 4-pela de

trening ol sumatin i bin kisim save inap lng ol i ken tok klia long ol samting i save kamapim klaimet senis na long bringim tingting bilong ol pipel i kam lng sindaun bilong ol nau long ples, olsem nau long taim bilong long-pela san na ples i drai. Trenign i helpim ol yut long kisim strong-pela tingting long mekim wok olsem ol sempion bilong klaimet senis. ChildFund PNG bai sekim ol na givim moa toksave na tok stia long ol bai mekim wok.

Trening em i hap bilong USAID Adaptive, Resilient, na Prodaktiv Egrikalsa projek long Papua Niugini, long promotim klaimet-smat egrikalsa. Em bai helpim long ol 12-pela komyuniti long Rigo Distrik, Sentral Provins long ol i no

inap sot lng kaikai lng taim bilong hangre i kamap.

Wantaim helpim bilong PACAM gren long mani mak bilong \$496,045, ChildFund PNG bai strongim ol lokal fama long ol wei bilong wokim faming long pasin tumbuna, lainim nupela wei bilong graun na wara, na long soim wanem ol kaikai i save stap strong long taim bilong bikpela san.

U.S. Embeseda Catherine Ebert-Gray i tok olsem Yunaitet Stets Gavman i gat strongpela tingting long helpim ol Pasifik Ailan kantri long sanap strong long bungim klaimet senis, em i wanpela salens we Yunaitet Stes na Papua Niugini gavman i wok bung wantiam long mekim.

Nambawan Super 2015 anual stetmen i redi

NAMBAWAN Super Limited i givim dispela tok save i go long ol memba olsem anual stetmen bilong yia 2015 em i redi long kisim.

Sif Eksekutiv Opisa bilong Nambawan Super Limited, Garry Tunstall, i tok ol memba i ken go lukim ol brens bilong ol na kisim kopi bilong stetmen bilong ol.

Narapela isi we long kisim dispela stetmen em yusim nupela NSL smat mobail app bilong Nambawan Super na kisim stetmen long mobail pon.

“Long stopim ol infomesen bilong ol memba i go lus nabaut long pos opis, Nambawan Super i stopim pasin bilong salim ol anual stetmen i go long ol pos opis.

Dispela i lukim namba bilong ol frot na paul pasin long yusim nem bilong wanpela memba na stilim mani i stop.

Mista Tunstall i tok sapos ol memba i laik kisim anual stetmen bilong ol, ol i mas askim ol NSL wok manmeri long brens i stap klostu long ol ol i ken ringim kol senta o askim long salim kam long email. Em i tok ol memba mas soim NSL membasip kad

bilong ol o wokples ID kad bilong ol long kisim stetmen.

Ol memba i ken yusim

- Tupela pei slip long wok ples bilong ol (long larim NSL i luksave olsem ol i memba tru)
- Kisim wanpela pas i kam long ol provinsal gavman wok manmeri olsem provinsal prolis komanda, helt atoriti siaman, edukesen edvaisa (het tisa o inspekta), ol humen risos opis bilong wok ples, na ol arapela ID kad olsem wokples ID, draiva laisens na paspot.

Long mun Febueri, NSL i tokaut long wanpela bikpela winmani ol i bin mekim. NSL i bin mekim K280 milien bihain long ol i peim takis mani long yia 2015 na dispela i lukim ol memba i kisim 5.8 pesen kredit reting.

Ol memba husat i laik kisim stetmen bilong ol i ken kolim 3095311, Digicel 73337777 o bmobile 76112222.



INVESTMENT TOKTOK with DR. STEPHEN NASH

Tingting bilong ikonomi bai i no gro strong long 2016 na ol samting we bai mekim ikonomi long lusim strong bilong en.

Sapos yu gat sampela askim, pls salim i kam long toktoksuper@nambawansuper.com.pg na mipela bai bekim.

Insait long dispela mun, NSL i laik toktok yet long kamapim strongim tok-save we mipela i givim long namba wan kwota bilong dispela yia, wantaim lukluk bilong 4-pela samting we i bung wantaim long dispela yia long daunim tingting bilong global ikonomi long gro. Dispela ol samting em: (a) Strongpela US ikonomi long go bikpela, (b) Strong bilong mani long Yurop na Siapan i pundaun, (c) Ikonomi gro long Saina i go daun isi, isi, na (d) Man mak bilong baim samting long US (rates) i go antap. Mi bai tok klia long wan, wan bilong ol dispela samting aninit long hia:

• Gro bilong Yunaitet Stets bilong Amerika (US) ikonomi i kamap strongpela pinis

US i bin wok long go bikpela na stat long taim bilong Global Fainensel Kraises (GFC), na em i min olsem mak bilong dispela ikonomi long gro em i kisim mak bilong em pinis olsem na nau em bai stop o bai i wok long go daun isi, isi. Maskim wantaim gro bilong em nau, em i no kisim mak we ol i bin putim long en, na ol reit bilong em i daunbilo tumas. Kain olsem eksampel, planti invesmen benk i bin wok long tok pait olsem bikpela gro tumas winim mak bai mekim reit o strong bilong mani i go antap tumas. Tasol dispela i no kamap olsem. Maski reit i bin go antap, bihain long mak bilong tanim bek bilong ikwiti maket long stat bilong 2009, klostu no gat man i ting olsem em bai kisim longpela taim long em i kamap, bikos em i 5-pela yia bihain long mak bilong tanim, o bai em i liklik tru olsem. Taim bilong senis long kamap leit na long liklik senis tru we i kamap nau em i soim olsem gro bilong ikonomi i no bin gutpela stret long tingting bilong maket na moa long ol invesmen benk,

• Ikonomi bilong Yurop na Siapan wok hat yet long holim strong bilong mani bilong ol

Ol ikonomi bilong Yurop na Siapan i wok long pait yet long holim strong bilong mani bilong ol. Kain olsem, ol bon menesa i bin wok long traim long salim 10 yia Bon bilong Siapan Gavman, stat yet long yia 2000, tasol wankain taim tu 10 yia reit i pundaun i go daun aninit long 2 pesen (%). Bringim 15 yia i kam, na nau 10 yia reit i kamap long ziro. Na gen, tingting bilong planti lain i bin krangi, long wanem hap ol mani kam insait bai go. Nau, samting i kamap long Siapan i wok long go long ol narapela kantri. Olsem, maket bilong planti kantri long Yurop nau i wok long bihainim lek mak bilong Siapan, na ol i no kisim bikpela mani tumas long ol samting ol i salim, bon maket bilong ol i soim olsem maket i not gro strong tumas na mak bilong inflesen i daunbilo; em wanpela samting we ikwiti maket i wok long wanbel long en isi, isi.

• Saina kamapim senis bilong nau em i birua long gro bilong ikonomi long wol.

Gro bilong Sania long nau em i birua long gro bilong global ikonomi. Gro bilong maket long Saina i no nogut; tasol em i no bikpela tumas olsem long mak bilong ol narapela taim, na strongpela gro bilong Saina make tem i bin strongpela mak bilong gro bilong wol maket. Nau dispela samting i pinis. Bikpela samting long ikonomi i gro isi, isi em olsem nau em i kamapim ol hevi we mi tokaut long ol hia; Ol reit long US bai wok long go antap yet Ol reit bilong US bai go antap moa na go isi, isi. Hevi bilong ikwiti maket em i no olsem Fed em i wok long apim ol reit bilong en, tasol moa long taim we em i kamap, olsem long taim we ikonomi bilong Yurop na Siapan i wok long gro isi, isi na we Saina tu i wok long bihainim tupela long wankain rot. Ol ikwiti we i kamap long bihain taim ikonomi i gro, maski piksa bilong ikonomi gro long bihain em i wok long go daun, olsem em i save kamap planti taim, ol ikwiti tu bai kamapim dispela kain piksa. Wantim olgeta dispela trupela piksa i bung wantaim long 2016, yu ken klia long astingting bilong ol fainensel maket bai tingting planti yet long dispela yia, na bilong wanem ol mani kamap i no long mak olsem bipo.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

BIGGER, BETTER, SAFER, STRONGER AND STILL NUMBER 1

Reynolds soim tru kala ...Bulldogs i daunim Titans

STAIL pilaia bilong Canterbury Bulldogs, Josh Reynolds, i soim tru kala bilong em na Bulldogs i daunim ol Gold Coast Titans.

Ol i bin lusim Reynolds long Stet ov Oriijin resis bilong dispela yia tasol kala bilong em long pilai i ken mekim na Kosa bilong Blues, Laurie Daley, i ken makim em.

Planti pilaia wantaim Reynolds i resis long go insait long Blues long pilai long Oriijin resis.

"Mi bai pilai gut na soim kala bilong mi olsem yet bikos planti ol bikpela gem bai kamap klostu long pinis bilong dispela yia," Reynolds i tok.



Ol Titans i takolim Josh Reynolds

Hunters i resis wantaim Bears

PNG Hunters i go long Gol Coast long Australia long makim ANZAC De na resis egensim Burleigh Bears long Kokoda Kap pait.

Dispela em i namba wan pilai bilong Hunters inap long taim ol i stat pilai long Intras Supa Kap resis insait long tupela yia.

Dispela resis i kamap namba wan pat long namba tu level bilong kalenda na resis i kamap long Mande i bungim planti sapota bilong Bears.

Long las yia pilai, foa tasan mameri i bin bung long lukim pilai i kamap namel long tupela wankain tim.

Sharks i daunim ol Panthers

CRONULLA Sharks i daunim ol Penrith Panthers, 20-18, long asples pilai graun, Shark Park, bilong ol Penrith.

Long ai bilong planti manmeri mak i moa long 14, 273, Jamie Soward i abrusim wanpela kik bilong ol Sharks long 77 minit. Tupela tim i ken kisim wankain poin, 20-20, na em i ken bringim gem i go long golden taim, sapos dispela konvesen kik i go insait.

Kik i no go insait na ol Panthers i lus namba tri taim long 2016 sisen.

MU i go insait long FA Kap fainel

PILAIA bilong ol Manchester United, Anthony Martial, i soim tru kala bilong em na ol United i daunim ol Everton, 2-1, long Wembley na ol i go insait long FA Kap fainel.

David de Gea em i wankain stail pilaia olsem Martial, em i golkipa bilong ol United i rausim wanpela kik we birua pilaia bilong

ol, Romelu Lukaku, kikim go insait long 57 minit. Dispela i sevim ol United long kamap wina.

Everton i bin pilai gut tasol Martial i skorum wanpela gol taim 1 seken i stap na ol United i win. Ol Everton i no bilip long dispela las minit win.



Anthony Martial i amamas wantaim ol sapota long Wembley



Michael Ennis long rait na Jamie Soward i bam.

Valentino Rossi i win long Spanish MotoGP



Valentino Rossi i stap pas long Spanish MotoGP

VALENTINO Rossi i stap pas long Jorge Lorenzo na Marc Marquez long stat bilong Spanish MotGP resis inap long pinis bilong resis na winim Spanish Gran Priks.

Win bilong Rossi em namba wan win long 10-pela resis.

Rossi i amamas long dispela win bikos em i bin lus long fainel resis bilong las yia.

Rossi i kamap 7-pela taim wol sempion na nau em i winim 9-pela resis long olgeta kategori long Jerez, tasol dispela em i namba wan win bilong em long 2009 inap nau.



GLASIM RAMU NiCo PROJEK



Wanpela Ramu NiCo, Wanpela Komyniti

Ramu NiCo putim moa mani long wok agrikalsa

RAMU NiCo Kampani i givim K12, 000 long supotim kakao nurseri projek bilong Lalok na Bom ples insait long Kostal paipain area long RaiCoast Distrik, Madang provins.

Dispela mani Komyniti Afes Agrikalsa tim bilong Ramu NiCo i yusim na kamapim 10, 000 kokoa neseri, 5, 000 long Bom na narapela 5, 000 long Lalok wei bai i benefetim moa long 300 farmers long tupela ples wantaim.

Wantaim prais bilong kakao nau yet i go antap na sanap olsem K5.30 wanpela kilo long ekspot baiya wanpela bek bai yu kisim mak mani olsem K530.00 Ramu NiCo kampani i wok strong yet long helpim ol lokal famas long wok egrikalsa na kisim kain benefit.

Kampani Egrikalsa tim husat i go pas long karim aut dispela projek i lukim olsem neseri ol wokim mas gro gut na noken gat sik na i kisim helpim long CCIP-INGL na Madang Provinsal Dipamen bilong Egrikalsa na Laipstok (DAL) long strongim na sapotim dispela neseri projek.

Egrikalsa supevaisa bilong Rami NiCo CA dipatmen, Allan Wawah i tok ol kisim helpim long CCIPNG na DAL long stopim dispela sik save bagarapim na kilim kakao wei ol i kolim lo Cocoa Pod Borer (CPB).

Mista Wawah tok wantaim dispela gutpela patnasip, CCIPNG helpim wantaim tupela wokman bilong em na bad stik we bai ol yusim long maritim ol neseri na stopim ol long kisim dispela sik.

“CCIPNG I givim bud stik long Steward Research Station bilong ol long Madang na mipela kisim ol i go na badim ol neseri long Bom na Lalok,”

“Wantaim helpim bilong ol bading em kisim 35 pela de long pinis,” Mista Wawah itok.

Em tok olgeta 10, 000 pela nurseri ol i badim na nau ol i gro gut tru na redi long ol fama bai kisim na planim.

Mista Wawah tok ol manmeri bilong Lalok na Bom i wok gut wantaim egrikalsa tim na lainim planti samting long we bilong wokim neseri na badim ol.

Em tok nau yet wok bilong bading em pinis na ol tim bilong em wok long monitorim na lukautim neseri long rausim ol binatang na sik nogut bilong kakao.

Mista Wawah tok tu olsem long namba tu wik bilong mun Me long dispela yia, bai ol karim trening na awenes long ol manmeri long Bom na Lalok long lukautim na planim ol neseri.

“Bai miplela tu wokim lonsing bipo long givim aut kakao neseri long ol fama long tupela ples na dispela bai kamap bihain long trening,”

Mista Wawah tok Ramu NiCo Kampani i putim egrikalsa i go namba wan long helpim ol manmeri kamap long projek erea.

“Kamapani mas kisim biknem long strongim wok egrikalsa maski nikel prais pundaun, pasim main long sotpela taim, bagarap long rot netwok na bikipela kos,” Mista Wawah tok.

Mista Wawah tok taim dispela projek i pinis, Ramu NiCo bai amamas tru long lukim ol lokal fama bilong Lalok na Bom ples growim na planim planti kakao, kamapim gutpela sindaun long ples bilong ol na wokim ol gutpela business.

Mista Wawah I tok tenkyu i go long Daniel Abuta man husait i wok hat tru long mekim wok bilong neseri projek kamap gutpela wantaim helpim bilong em long kaikai, ples bilong slip, na bot bilong trenspotim ol badas.



Wanpela fama wok hat long wokim bading.



Wanpela bada bilong CCIPNG lainim ol man we long wokim bading.



Tupela badas bilong CCIPNG wantaim ol fama i sanap long Lalok kakao neseri.



KBK Mining

135 KM Slurry Pipeline



BSK Refinery





Ol kriket pilaia bilong olgeta divisen i sanap bung wantaim long taim bilong lonsim ITI POMCA Junia kriket resis.

TVWAN i wokim laip kavarej long golp resis



Stephen Dawanincura i stap long rait han, Dave Conn i stap long name i na Tasman Samuel i toktok long 2016 SP Ekspot Radla PNG Open. Piksa: Philemon Tame

TVWAN i skruim kavarej bilong ol long spot wantaim Queenslan Intras Supa Kap resis, Digicel Kap resis na nau ol i skruim moa i kam long 2016 SP Ekspot Radla PNG Open.

TVWAN i statim laiv kavarej bilong PNG Open long Fraide inap Sande taim resis i pinis.

Bos bilong spot nius na prodaksen bilong TVWAN, Eggert Gunnarsson, i tok

olsem, long kisim laiv kavarej long ragbi lig em i narakain long golp resis, tasol ol i mekim sampela liklik tenis long bringim laip kavarej long golp resis.

“Nesanel Futbal Stediam em i isi long kisim laiv kavarej bikos em i liklik hap, tasol long golp resis em i hat liklik na mipela i putim 5-pela tawa bilong redim kemera long kisim ol gutpela kavarej,” Gunnarsson i tok.

Em i tok moa olsem, golp em i narakain long ol narapela spot bikos ol pilaia i save kisim bikpela taim long wokabaut i go long hap we bal i save pundaun na kemera i save kisim planti piksa.

“TVWAN i lukluk tu long redim laiv kavarej bilong Digicel Kap long ol narapela hap long kantri olsem Rabau, Goroka na planti moa,” Gunnarsson i tok.

Queenslan i stap pas long namba tri de resis

QUEENSLAN golp pilaia, Peter Martin, i stap pas wantaim 11 anda skoa 205 bihain long namba tri de resis bilong 2016 Saut Pasifik Ekspot Radla PNG Open long Royal Pot Mosbi Golp Klap.

Martin i bin skorim tu anda 70 long Fonde, Faiv anda 67 long Fraide na Foa anda 68 long namba tri de, Sarere, i bringim skoa bilong em i go antap long 205.

Tasol, tupela pilaia i

kamap klostu long Martin wantaim 10 anda skoa 206 em Aaron Wilkin long Queenslan na Mitchell A Brown long Nu Saut Wels.

Anthony Quayle na Damien Jordan i stap namba tri ples long namba tri de resis wantaim 9 anda skoa 207.

Foapela pilaia i stap namba foa ples long wankain resis wantaim 8 anda skoa 208 em Michael Wright, Tom Bond, Taylor Macdonald na Kristopher

Mueck.

Namba foa na las de resis i bin kamap long Sande we prais mani em K337, 626.13.

Brad Moules bilong Saut Australia i bin stap pas long resis wantaim 6 anda skoa 66 taim ol i stat resis long namba wan de.

Moules i mekim gutpela stat na i kisim namba tour kad bilong em.

Long namba tu de bilong resis, Brown i bin kamap namba wan wantaim faiv anda 67 long Fraide.

ITI POMCA Junia resis i stat

ITI POMCA Junia resis bilong kriket i stat long las wik wantaim 31 tim anit long 4-pela divisen. Dispela resis i kamap long 6-pela hap insait long Nesanel Kapitil Distrik.

Long anda 19 divisen, i gat 9-pela klap i rejista long pilai

long hat-bal T20 fomet. Tenpela tim i rejista long anda 17 divisen, 6-pela tim i rejista long anda 15 divisen na 6-pela long anda 13 divisen.

Ol hap we resis bai kamap em long Amini Park, Colts Graun 2, Kilakila, Sir Hubert Murray Stediam namba 2 na

long Vabukori.

“Mipela i amamas long tokaut long ITI POMCA Junia resis na mipela i gat bikpela laik tru long ol pilaia, klap na komyuniti i soim amamas na sapot,” Vais presiden bilong POMCA, Charles Amini, i tok.

Namba 6 gren fainel bilong ACA i kamap

AHIOMA Kriket Asosiesen (ACA) i kamapim namba 6 gren fainel resis bilong ol long stat bilong dispela mun long Alotau, Milne Bei Provins.

ACA i bin join wantaim Kriket PNG (CPNG), i tokaut long nupela pilai graun bilong kriket. Na long wankain taim, Hai Pefomens dipatmen bilong CPNG i bin ranim Swire Siping Aidentifikesen Developmen (TID) program.

Asisten Kosa na Patwei Kodineta bilong HEBOU PNG Barramundis, John Ovia, na Kosa bilong City Pharmacy PNG Lewa, Rodney Maha, i bin stap wantaim long taim bilong namba 6 gren fainel

bilong ACA.

Presiden bilong ACA, Harley Dickson, i tok tenkyu long presiden husat i lusim sia, Amua Buama, ol eksekutiv bilong em na CPNG long ol i redim pilai graun bilong kriket.

Maha i bekim tok olsem, “Dispela em i narapela step we dispela asosiesen i winim na ol lain husat i stap long dispela taim i lukim dispela spesel taim bilong ACA. Lukautim dispela pilai graun gut bikos dispela em i hap we olgeta resis bai kamap long ol yia i kam.”

ACA gren fainel i bin stat wantaim sempion bilong las sisen bihain long ol i tokaut

long kriket pilai graun. Ol tim husat i resis long gren fainel em Mixmates i pilai egensim Amoiha long Divisen bilong ol meri na Amoiha i resis egensim ol Falcons long PremiaDivisen bilong ol man.

I nogat wanpela tim i daunim Mixmates inap long stat bilong regula sisen i soim kala bilong em gut tru na daunim Amoiha wantaim 8-pela ran long grenfainel resis bilong ol meri.

Amoiha i daunim Falcon long gren fainel resis bilong ol man na wiket kipa bilong ol Amoiha, Gubiam Elly, i kisim awod long em i bin pilai gut.



Piksa i soim ol man na meri pilaia bilong Tim Ahiona



Kristopher Mueck, husat i stap namba 4 ples long namba tri de resis i wokabaut i kam long hol taim narapela golpa i sinkim bal. Piksa: Philemon Tame

Tigers i daunim Vipers long asples

Philemon Tame i raitim

LAE Snax Tigers i daunim ol Stop & Shop Pot Mosbi Vipers long asples bilong ol long raun namba tu bilong Digicel Kap resis i bin kamap long Epril 24.

Pilai namel long Tigers na Vipers i bin kamap long Nesenel Futbol Stediam long Pot Mosbi we Tigers i lusim ples bilong ol na i kam daunim ol Vipers wantaim 18 poin. Skoa bilong tupela tim i sanap olsem 28-10.

Tigers i stap sambai long raun namba wan resis, tasol long raun namba tu resis, em i kisim namba wan ples long progresiv lada na Vipers i stap namba 10 ples bikos, Tigers i win wantaim bikipela poin.

Long wankain taim, Bintangor Goroka Lahanis i bin askim ol boi long Hela, Kemele Hela Wigmen, long pilai wantaim ol long asples bilong ol long Goroka.

Ol Goroka i kisim moa strong long asples bilong ol na i daunim ol boi Hela, 20-8. Lahanis i stap namba tu long progresiv lada taim ol Wigmen i stap namba 6 ples long raun namba tu resis bilong Digicel Kap.

Agmark Rabaul Gurias i stap sambai long raun namba tu resis, tasol ol i stap namba tri ples long progresiv lada bikos ol i kisim planti skoa long raun namba wan resis.

Ol tim i stap namba wan, tu na tri ples i gat wankain poin we poin bilong ol i sanap olsem 4 long progresiv lada. Ol Wigmen i kisim tu poin tasol, Vipers i no kisim wanpela poin yet bikos ol i lus long tupela raun.

Wamp Nga Maunt Hagen Eagles i bin pilai wantaim ol PRK Mendi Muruks long asples bilong ol Muruks. Tupela tim wantaim i strong tumas na i kisim wankain skoa, 16-16.

Ol Hagen i stap namba 4 ples long progresiv lada wantaim tripela poin na ol Mendi i stap namba 8 ples wantaim wanpela poin.

PRK Galp Isapeas i bin daunim ol Vipers long raun namba wan, tasol long raun namba tu, ol i kisim wankain poin, 20-20, egensim birua tim bilong ol, Waghi Tumbe. Dispela pilai i bin kamap long Minj, asples bilong ol Waghi.

Isapeas i stap namba 5 ples long progresiv lada wantaim tripela poin na Tumbe i stap namba 9 ples wantaim 1 poin.

EPG Enga Mioks i daunim ol TNA Simbi Lions, 32-24, long asples bilong ol long Wabag. Mioks i stap namba 7 ples long progresiv lada wantaim tupela poin na Lions i no kisim wanpela poin yet bikos em i no bin win long tupela raun ol i pilai pinis. Lions i stap 11 ples long lada.

Foapela etlit i setim nesanel rekot



Piksa i soim Kaputin i resis long Long Sam.

FOAPELA etlit, Debono Paraka, Rellie Kaputin, Toea Wisil na Jacklyn Travertz i setim nesanel rekot bilong etletik long dispela yia.

Paraka i brukim nesnel rekot bilong em yet long diskas long Pot Mosbi long Sarere. Bipo em i bin tromoi diskas inap long 46 senti mita, dispela nau em i bin abrusim dispela mak wantaim 50.21 mita.

Paraka i bin abrusim rekot wantaim 50 mita em i dri-man bilong em taim las yia i stat, tasol gutpela mak we Albert Momberger i putim long las yia em 49.79 mita na nau Paraka i winim dispela nesanel rekot.

Long wankain taim, Rellie Kaputin long Nu Meksiko, i mekim gut long tripol sam na winim nesanel rekot, 12.65 mita, we em yet i bin setim long winim gol medal long Pasifik Gems long las yia. Em i bin winim dispela rekot wantaim 12.78 mita.

Dispela tupela rekot i bringim total rekot i go antap long foa bikos Toea Wisil i setim nupela rekot long 200 mita resis long Canberra long Februeri na Jacklyn Travertz i setim rekot long tromoi hama long mun Mas.

Seketeri bilong Etletiks PNG, Philip Rehder, i tok, "Ol etlit bilong mipela i

setim 10-pela nesanel rekot long las yia na dispela em i bikipela mak tru mipela i winim. Nau mipela bai inap long kamap long dispela mak o winim dispela mak.

"Mipela i gat Toea Wisil i mekim gut long winim 100 mita resis na Rellie i kamap namba wan tu long long sam. Na tu, mipela i gat Theo Piniau naq Nelson

Stone i lukluk long Rio Seleksen long 200 mita resis.

"Antap long dispela, Adrine Monagi, i mekim gut long heptathlon na Peniel Richard i mekim gut long tripol na hai jamp.

"Ol dispela etlit husat i mekim gut bai go het long setim nesanel rekot long ol wan wan pilai ol i resis long en," Rehder i tok.



Rellie Kaputin long Nu Meksiko, i mekim gut long tripol sam na winim nesanel rekot, 12.65 mita, we em yet i bin setim long winim gol medal long Pasifik Gems long las yia. Em i bin winim dispela rekot wantaim 12.78 mita.

Tripela bai resis long kisim wanpela ples

i kam long bek pes

Sapos wanpela etlit i ran kwiktai bai kisim moa poin long pefomens bilong em na ol poin bai kamaut long tebel.

PNG bai makim etlit husat bai gat hai renking pefomens long tebel long Jun 19.

Stone i bin go long Singapore long Tunde, 26 Epril, long Singapore Open Sempionsip we em i lukluk long go insait long resis wantaim gutpela taim long 200 mita na 400 mita resis.

Ol i bin makim 28 etlit long resis long 200 mita. Aninit long dispela, ol i bin makim Muhammad Rozikin long Indonesia, husat i gat namba wan taim

long dispela yia we em i bin klokim 21.41 seken.

Tasol, i gat ol narapela Indonesia wantaim ol etlit bilong Malaysia, Brunei na Singapore bai resis long fil iven.

Strongpela fil resis bai kamap em long 400 mita we kwiktai rana bilong Philippines, Edgardo Alegan, husat i gat rekot wantaim 46.91 seken, wanpela Indonesia rana i gat 47.21 seken na rana long Hong Kong i gat 47.28 seken.

Resis bai stat long Fonde moning wantaim 400 mita resis long 11 klok na fainel bai kamap long 6 klok avinun na 200 mita resis bai kamap long Fraide.

BOOK ONLINE NOW & PAY LATER

within 48 hours at your nearest Air Niugini Sales Office.

Call toll free on 180 5465 visit www.airniugini.com.pg or email sales.linkpng@airniugini.com.pg for further information.



LinkPNG

A Subsidiary of Air Niugini





Tim PNG Pawa B gret redi long gren fainal bilong Sofbal.



PNG Golp open eksen i kamap long Royal Pot Mosbi Golp Klap.



Rayan Pini i givim medol long ol liklik swima long Thedist kompetisen long Mosbi long wiken.



Rellie Kaputin i winim 6.04 mita long Long Jamp long Canyon. Kaputin i mekim wok redi long resis NCAA Di-visen Tu Nesenel Sempionsip long Florida we em bai kamap long pins bilong Mun Me.



Nancy Malamut bilong PNG Etlekik i ran strong na soim kala bilong em long 400 mita resis long Sir Ignatius Kilage Stediam long Lae bihain long em i statim etlekik spot bilong em long 100 mita na 200 mita resis.



Theo Pinau i putim siot wantaim namba 4 i stap long pran i resis strong long kisim wanpela ples i stap long trek na fil resis bilong ol man etlit bilong Tim PNG long go long Rio Olimpik Gems. Pinau i klokim 21.39 seken long 200 mita resis long Canyon, Texas.



DIANA

Tuna

Niupela Swit Teist
Nau Igat Moa Oil!



PNG's ORIGINAL TUNA

 Manufactured by:
RD TUNA CANNERS LTD.

Tripela bai resis long kisim wanpela ples



Mowen Boino i resis long namel egensim tupela birua rana long 400 mita hadel long Nu Meksiko long Sarere. Piksa: Brian Barrett.

TRIPLELA man etlit bilong Papua Niugini bai resis long wik i kam long kisim wanpela ples long go resis long Rio Olimpik Gems.

Dispela ples we PNG i makim em long trek na fil resis long Olimpik Gems aninit long Yunivesiti rul.

Ol etlit husat bai resis em Mowen Boino, Theo Piniau na Nelson Stone.

Boino i abrusim Piniau long renking lista long Sarere bihain long em i bin mekim gut long 400 mita hadel.

Boino i bin klokim 52.33 seken long Nu Meksiko long Sarere we dispela i winim poin bilong Piniau, husat i klokim 21.39 seken long 200 mita ran long stat bilong dispela mun..

IAAF tebol bilong kisim skoa em olgeta lain i luksave long dispela rot bilong lukluk long ol pefomens bilong ol wan wan resis.

ridim moa long dispela stori long pes 26

Taim yu senisim nepi bilong bebi bilong yu

Senisim long Sensi

Good Products, Better Prices, ikam long

 **Johnstons Pharmacies Ltd**

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

